



ル 5
3048.
13



門 8
號 3001
卷 13

門 8
號 2301
卷 13

門 5
號 3048
卷 13

崑新兩縣續修合志卷二十九

孝友

宋

馬友直字伯忠其先本司馬氏有名球者仕吳越以御史中丞為崑山鎮防遏使因家焉子孫止稱馬氏聚族於邑之全吳鄉角直里以孝友著兄弟六人皆力穡獨友直以儒業自奮入太學元符二年薦春官與李廌遊廌知友直賢以兄子妻之宣和四年水災全吳之田與江通兄弟狼狽營妻子友直獨奉其親徙邑中進賢里僦屋以居躬具菽水母子晏如王葆唐輝咸愛重之建炎二年特科奏名主武康簿監南嶽廟以宣教郎致仕孫

昭和九年
六月十八日
購

先覺字少伊以文章名與樂備范成大友善登紹興三十年進士初主海門簿調常州教授既歸時宰辟爲沿海制置司幹官以先覺自重難挽徑以名聞授兵部架閣朝奉郎不事請謁出爲浙西常平幹官以承議郎主管台州崇道觀號得閒居士

傳內防邊使防字衍

龔明之字熙仲宗元曾孫明之幼逮事祖母李李自言少嘗大病夢神告曰與汝七十七及期果病且革明之夜禱於天乞減己五齡以益李壽灼香於頂者七聞腦中爆裂聲不爲動許旦李病果愈又五年乃卒宣和二年明之以諸生貢京師迎父母往已而母與弟相繼亡去鄉數千里貧無以歸葬或使之旅殯僧舍否則火之以

燼歸明之不從取其家所有自一錢之直皆折賣之不足又乞貸之得護二喪以歸先墓在西山大木數萬族人利其直悉斬而分之明之不能制獨泣且罵每伐一木仆輒號慟聲振林谷卽買松萬株補植焉一從女二甥女俱幼明之養於家積館穀資送之紹興二十年鄉貢年已六十或勸少匿其數笑曰吾生平不敢自欺卒書其實晚以特恩廷試授高州文學年逾八十法不應入官吳士在朝者列奏其行義敕監潭州南嶽廟淳熙五年乞歸鄉人奉直大夫林振等舉明之經明行修議論操履眾所師法請之朝先是慶壽赦文內孝行節誼著於鄉閭仰長吏保明當議旌錄時參政錢良臣謂明

之無吏考難之吳仁傑曰龔君頃以至行能動上帝知其今日必能動人主因具言其事果得旨超授宣教郎致仕仍賜緋魚居崑山黃姑別墅作期頤堂日嘯詠其間一日感微疾精神蕭爽親友問疾歌以答之遺令無設仙佛像於柩前供一水一花誦論語孝經足矣年九十有二明之生平不摘人短不作貌言自謂平日受用惟一誠字嘗附益山谷語以省喫儉用號五休居士子昱字立道少游侍御李衡門有學行嘗編樂菴語錄崑山雜錄行於世安貧樂道稱龔山長名不逮才識者惜之所居曰栖閒堂陸游劉過皆爲賦詩

衛時敏與弟季敏友愛甚篤三世同居寧宗御書友順堂

匾賜之季敏子涇

陳振字震亨古靈先生襄之後父遵贅侍御李衡女因家於崑遵死振幼貧無以歸葬得地圓明村卜者云不利長子振曰使親藏得安卽不宜於振有弟尙可主祭遂葬焉後舉紹定進士弟拱字泰亨亦登端平科官武康主簿振以祿不逮養刻木爲親像一飯必祭平生急義樂善汲引後進有過必規爲文簡健高雅善楷法得歐虞氣骨官至太府丞知永瑞三州以朝議大夫致仕卒贈通議大夫子昌世

周津善詞賦端平嘉熙中郡府兩舉待補進士性介直好義父天驥有疾刲股以療或以義諭之津曰父母遺體

皇朝通志卷二十九
三
豈敢毀傷然以所子者還以奉之詎爲過耶津亦以壽
終又有曹椿年母病革刲股療之知縣胡察白於府知
府趙汝厯以事聞借補承信郎節制司準使立孝感坊
於陳老橋西又咸淳八年有榮孝子亦以刲股救母立
旌孝坊其後又有張孝子俱同縣市人

元

秦玉字德卿其先鹽城人宋贈直龍圖閣觀八世孫祖棟
統領淮東沿海制置使徙崇明父庚再徙崑山從方蛟
峯學玉少孤家貧母顧織紵給業不令玉分讀書志玉
益感奮旣長博通諸經尤邃於詩不求仕進授徒講學
二十餘年與兄未嘗異財凡事悉稟母兄命母卒終喪

不澡洗不鹽酪鄰居失火熾甚母殯在堂玉憑棺號慟
願以身殉火抵牖而滅人以爲孝感卒年五十三門人
私謚孝友先生子約

瞿信字實夫其先嘉定人父晟遷崑山兄智字睿夫好學
明易善詩工書法兼擅畫蘭與句曲外史張雨輩友善
至正間以薦授青龍鎮教諭攝紹興府錄判遭亂棄官
信自幼嗜學與兄齊名平居無卒聲辟貌未嘗談人過
惡家雖貧奉養二親備極誠孝兄卒孤兒女數人教養
婚嫁一如已出元末台寇作信奉母避青龍海上顏其
室曰闕野南臺御史李烈舉孝廉不應卒年五十六子
度好學有文采洪武初知陝西金縣

明

殷壁字孝連奎弟洪武中奎卒於咸陽官署壁謂弟箕曰
母老吾弟侍膝下吾當遠迎兄柩遂間關數千里扶喪
以歸人高其行爲畫歸柩圖且爲文表之箕字孝揚嗜
學好禮篤於孝友與兩兄齊名洪武五年舉秀才試廣
西僉事終太平府推官以廉謹聞

陸安字修平邑天區三晉道德坊人父德甫好結友友坐
法當死德甫不知爲保出獄友遽逸有司遂坐德甫當
棄市安時年二十一婚甫浹旬卽與兄及妻訣別抵京
大書代父典刑四字於布袍伏闕哀請許之臨刑從容
就刃觀者數千人無不泣下德甫伏屍哭提骨東歸妻

鍾抱骨哭盡哀亦自經死後七十年從孫需乞沈魯作
孝貞記崇禎末知縣萬曰吉表其墓

范從文字復之之柔六世孫父原良爲潮州推官卒於任
從文方弱冠匍匐至潮求攢不得日夜號泣忽大雨潰
封得標識乃函骨歸葬洪武中以國子生奉使稱旨擢
監察御史改戶部主事奏免株連盜倉罪百餘人俄爲
同官所陷得罪且死呼曰幸以先祖赦宥上問曰祖爲
誰曰范仲淹上曰得非先憂後樂者耶於是末減謫役
莊浪復追戍金齒徙廣南永樂初以薦起爲金華訓導
歷東安金鄉三學致仕歸年八十七卒

顧潛志從文由
謫戍後爲金華

訓導至永樂五年始得父骨於
潮州之胡盧山與方志小異

范廷珍字惟中父彥良著望著於鄉洪武中以里中子不法事連坐彥良廷珍率其弟廷珪詣官懇代百折無少訛官爲感動得未減兄弟俱戍河間廷珍故善醫遂以醫濟河間人無論貴賤貧富招必往應手奏效晚年學益該洽好吟詠書法率更尤長於齋閣題署年九十餘猶日作數十紙弗厭侍郎葉盛爲傳其事

俞敬字用禮髫鬣喪父母爲張姓養子張頗虐之妻孫曲爲庇護愛之如己出敬事之亦如親母後孫違危疾醫藥寡效敬籲天刺左脇割肝和糜以進尋瘳旣復作又割左膊肉進之病遂愈示樂中有司上其事詔旌其門薦授尚寶司丞洪熙元年陞少卿復俞姓贈所生父母

如其官正統六年陞卿卒年六十四

梁棟其先河南人宋承德郎平陽通判仲德始徙崑山子澤民元廸功郎婺州經歷孫燦將仕郎太谷主簿燦子孟鏞卽棟父也洪武中任館陶主簿調夔州萬縣在館陶時以第六子鏞爲人贅婿母憐其幼嚙其臂以爲識流血而別孟鏞卒棟思鏞不置徒步至館陶已失鏞所在自是隨所至求之垂三十年一日以事往松江寓東禪寺會大雨有僧袒而決渠露癢痕棟心動就與語卽鏞也馳歸告母往驗之嚙痕宛然抱持大哭遂攜歸相友愛終其身子昱

甘霖字用汝博學工文宣德乙卯貢入太學授延平府同

知轉衢州衢大旱徒步虔禱雨遂澍考滿致仕卒年八十五霖性孝友初父伯清疾亟以孽子密屬霖善撫之迨霖遊成均密家居嬉游入市遂失所在霖聞之悲愴不自勝蹤跡萬端弗獲後謁選入都祀其先日霖不遇密不敢就職旋得之京民安士傑家爲奴乃奔告達官贖歸友愛彌摯

徐任字惟用世居婁東父彥輝宣德中卒於京邸任扶櫬旋里日夕悲號繼以血母楊疾每夜露禱北辰三刻其股作糜以進疾漸瘳人稱孝感

梁昱字文輝棟之子新娶三日遭父喪遂不入寢舍苦塊三年御酒內弗御正統十二年應試南都吏部尚書魏

驥特往拜之咨嗟良久提學御史孫鼎嘗贈以詩有孝著崑山第一人之句旋領鄉薦授平定州牧平易得民惠政甚多未幾卒於官柩歸之日士民哭送者幾千人孟羹瓦飯相望於道子統字尙素由鄉舉累官至泉州同知愷悌清勤兩平巨寇民爲立石以頌致仕家居檢身治家必遵矩矱爲無忝世族云

支琮字敬將邑諸生身長口吃學務深入人謂之魯勿較也家貧奉母不能具純綿寒夜必以己所服青布袍覆母疊跣而坐有郡倅重其人凌晨往候母寢方熟琮不敢入戶竟短衣出見倅知其故歎息而去尙書周忱撫吳時嘗厚卹之正統間以貢選授南京留守衛經歷

王鑑字與修世居邑之度城舉天順壬午鄉試好讀尚書
謂二帝三王之道在此嘗大書忠孝二字於壁以自勵
成化辛丑上春官卒於逆旅遺其長子漳書曰而祖以
千金付我將貽汝仲父二孤孤尚幼我緘而藏之某柱
下書到卽相付無他囑勉思壁上二大字而已漳得書
發柱取金不開緘而與之時年十九人稱其廉孝次子
淇更名懋德字勉修亦以學行稱漳孫繼孝自有傳

陸鑑字汝昭其先世戍洱海例應輸值兄鏞往代鑑獨與
母居發憤讀書領成化乙酉鄉薦選東昌府通判會轉
運京師鉤得弊孔餘鏹千計明年再往亦如之有能吏
名念母不逮養兄戍萬里外時爲流涕繪風木鶴原圖

見志遂致仕兄戍滿迎歸與同寢食以終

邢桂字思芳力田自給母宋性嚴厲每不懌桂輒長跪請
命遇夜寒令妻侍寢以溫其被嘗命市所嗜物一僅得
其一母怒桂跪而受責不敢退時桂年已五十餘矣癸
暑中母忽病亟醫藥罔驗桂露禱乞延果於秋涼時卒
母素信佛臨終囑桂曰吾死當以舌舐吾目庶不迷冥
途及是桂且哭且舐蓋棺而止

張注字時雨其先世爲汴人建炎中南徙祖旭諸生父能
字尙德以貢授浙江新城知縣性耿介喜吟好施與積
十二年無吏議堅請致仕注文雅倜儻如其父善事親
父好客客常滿座注供奉豐腆務以悅親人不知其貧

也由歲貢歷宜春潮陽訓導士論翕然既歸潮人立祠奉之子鑾亦以孝聞鑾子寬別有傳

周在字承德早孤力學家故饒盡爲伯氏有羣季欲聞諸理在曰兄等必欲詣有司吾當言先人無厚積也羣季意沮伯氏亦悔悟以遺貲析諸弟在入贅吳氏吳俗婦翁無子嗣子與贅婿中分其產在讓而弗受仲兄卒議以在子嗣在念父元學欲置義田八百畝贍族未果及是乃請諸兄就仲產而割已產益之得八百畝置義莊以贍族人立義塾以教族之子弟建綏成祠祀始遷祖及族之無後者後舉宏治壬子鄉薦計偕春官疏上十事皆中吳中利病授養利知州卽致仕子復俊

徐協祥諸生有孝行宏治初圃中生並蒂瓜人以爲孝感知縣楊子器上聞詔旌其門時干墩有王鐵匠者刲股以愈親疾子器亦給匾旌之

沈濤字洪伯魯孫父存城武知縣濤性孝友父病危每夜露禱求代父尋愈授田二頃悉讓諸弟父卒於外號慟不食者累月葬後廬墓三年有異烏靈芝之瑞子大楠爲季弟湏後自有傳次大樑以貢授樂清縣丞

歸鉞字汝威早喪母父更娶後妻生子鉞遂失愛父偶撻鉞繼母輒索大杖與之家貧食不足每炊將熟卽譏譏數鉞過父怒而逐之鉞數困匍匐道中比歸父母相與言曰在外作賊耳又復杖之屢瀕於死及父卒母益撻

不見因販鹽市中時私從弟問母飲食致甘鮮焉正德
庚午大饑母不能自活鉞涕泣奉迎母內自慚不欲往
然以無所資迄從之鉞得食先母弟而已有餓色弟尋
死鉞養母終其身嘉靖壬辰無疾而卒族子繡字華伯
亦販鹽以養母已又坐市中賣棘與兩弟綿緯友愛無
間緯以事坐繫繡力爲營救至數四耗其母錢終無愠
容繡妻朱每製衣必三襲曰二叔無室豈可使君獨被
完潔耶叔亡有遺孤撫愛之如己出里人稱歸氏二孝
子按歸有光傳不著里居明史作嘉定縣人崑邑前後
諸志皆不載惟王志堅葉隱志傳有之仍原志纂入
秦瓚販米市人也獲蠅頭餬口父頗豪俠瓚惟命是供父
卒喪葬不遺餘力嘗繪遺像以祀一夕夢父詰之曰吾

日旁有一斑而忘之耶奉母甘旨甚豐見母常戚戚瓚
知意在女也卽迎歸周卹終其身

王任用字汝欽嘉靖丁未進士授太常博士遷禮部主事
奉使還行母里中會島夷內訌與知縣祝乾壽同心捍
禦間歸慰母母聞金鉦聲輒震恐任用念城陷無以存
母乃攀陟危磴得深穴於馬鞍山西麓扶母以往納棗
栗數斛其中寇退乃已會有間乾壽於御史孫慎者任
用入白令身捍大難已濟而間之非天道慎獲且怒明
日置酒召任用未終席病發扶歸逆旅卒年五十四
王億字輔之資孫父慶字元吉以貢官尉氏教諭億幼孤
奉母孝與兄俸從兄傅切劖爲學尤精易理母晚歲病

厲不能寐億臥起榻旁歷寒暑不輟逾年遂瘳事兄最
謹每聞警欬聲輒屏立以俟生平所得修脯未嘗自私
困諸生四十年甲寅倭寇之亂億條上守城事宜城得
全分司熊某浚瓦浦億上三江圖說頗采納行之及子
宇貴益杜門卻掃里中稱後舟先生

陸懋字邦美有姊嫁於蔣父特愛之嘉靖甲寅之亂倭噪
西北城懋在城上見姊與其夫爲賊所執將加害懋自
投而下跪泣請曰殺吾姊必死吾父乞代姊死以全父
賊義之釋其姊夫婦去令懋負擔懋視其姊去遠提擔
撲賊賊逐之懋走叢棘中傷足遂遇害懋兄愚慟哭覓
尸按所衣禪襦得之而髑髏纍纍模糊不可辨愚哭曰

是吾弟邦美者瞑眼當開有髑髏眼閃閃動與頸合乃

藁葬城西

原註嘉靖中倭寇之亂崑山受禍最烈顧夢圭甲寅時事記云殺人以萬計婦女多自盡歸有光倭寇始末亦云願以日久失傳孝烈之行僅志一二殊可慨也

徐汝龍字言卿交河縣主簿一元子母費生汝龍年十四
補諸生天性孝友以不逮事前母梅每祭必隕涕及費
卒事父暨繼母桂俱盡禮及棄養所遺田廬悉予三庶
弟異母姊妹四人厚遇之先是邑被島夷患南門外老
屋焚掠一空僦居外家顧氏公私告竭迨後家稍裕奉
外舅姑如父母優卹其嗣以報患難相依之德姑沈叔
母周及同產妹適周者老而貧皆迎養之生平亮直倜
儻周急拯困惟恐不及卒年六十五子應聘見列傳孫

永芳字懋孺萬曆丙午副貢應聘仕至太僕卿卒於官
永芳扶襯回籍喪葬哭踊哀感行路永美字含孺萬曆
乙卯副貢工舉業饒才思聞父訃常飲泣以不得視含
爲憾得咯血疾毀卒

葛應元儒士縉長子居東鄉兵墟村幼失怙與弟應文事
母周克敦子職初倭寇滋擾周提挈二子奔走流離又
遭水災饑殍常不給欲棄應文應元時尚幼泣曰吾願
與弟同死不願獨生母遂止後應文無嗣應元爲置後
盡以家貲讓弟而已無所私子錫璠官至太常卿

張世科字孝徵廣平台擢秀孫邑諸生父應倫以負氣忤
里豪遂誣以殺人事對簿時世科袒跣翼蔽父於訟庭

父將下獄世科號呼曰卽吾父誣服死非法五步之內
願與父俱戮耳言訖以頭觸柱血流漬面吏憐而白之
自後不復預人事年八十過家祭猶哭不成聲子廷對
孫爵錫俱諸生績學勵行無忝家風

秦霑字光甫其先上海人父奎以避仇徙崑山霑年十七
補諸生其族仇必欲陷其父成大獄霑投牒訴御史御
史已有所入怒杖霑十五叱之出召獄吏取狀霑伺吏
入府探其懷得病狀則父名在焉乃大哭與俱白太守
曰父中仇非法也今又不死法而死吏如天道何言訖
淚蔽面趾盡裂太守憐之爲白御史得少緩明年他使
者至卒從末減嘉靖壬子霑舉於鄉隆慶中授德化知

縣覆戶均徭積穀訓士爲八閩冠丁祖母喪歸服闋補
寧陵有大盜剽攻發塚更兩令不能獲霑授方畧立捕
戮之未幾卒於任霑遇事立剖於疑獄必重持之曰向
者父獄起我仰視堂上人皆虎狼也今我坐堂上庸知
堂下人不虎狼我耶故所至無冤抑云

沈楠星溪人幼喪父迨長備耕養母嘉靖三十二年母姜
感痰疾醫治不瘥乃齋戒盟佛前剖左乳煨湯以進母
口已閉取匙灌之盡乳而甦縣令將旌異之堅辭不可
又三年母復病垂死又剖右乳如前立愈御史周如斗
爲請於朝旌其門其後庠生顧允烈剖股療母人莫知
其創處太學生許獻吉剖股療父至執喪不能起人始

知之庠生沈經國父日昌病剖股煮湯飲之而痊禮部
儒士徐寧祐父母疾篤剖股雜藥以進俱得痊經國寧
祐並御史王道直旌之時天啓六年也

潘士元字長之有至性母嚴得未疾不能俯仰士元起臥
抱持數年不倦迨卒毀瘠嘔血治喪雖貧不廢禮父質
夫好與客奕士元隨時設具不令知匱乏如是者二十
年御史甘士价知其賢令縣調卹立償人殆盡惟製一
棉布褲禦寒而已善說詩有聲諸生間年才五十卒
朱秉字字用誠陳墓人幼孤家貧事其祖冕以孝聞祖嘗
患瘍秉字徒步求醫越二百里外半塗委頓旅次哀號
同邸陳某等憐之破囊以贈醫亦感其誠出靈藥療治

得愈舉嘉靖庚子鄉薦授山東陽信教諭遷翰林院孔
目聞祖訃悲慟而卒同年生歸有光爲經紀其喪歸葬
秉字篤志嗜學尤長於詩嘉隆間詩學爭鳴秉字不肯
詭隨獨抒心得爲識者所稱族子煥字武夷亦工詩筆
格甚高得青蓮之一體

李文詠字蒼石魏恭簡校從孫邑諸生父大經以貢授沂
水知縣致仕家居文詠奉養備至萬曆二十七年冬夕
父從外飲歸二鼓登樓就寢文詠寢其下聞爆裂聲披
衣直上則煙焰焱赫而父尙鼾睡文詠哀號不知所爲
僕李安急挽文詠出文詠不顧俄椽棟盡折父子俱焚
死火熄發視文詠屍猶覆其父父存全體文詠僅留一

股知縣樊玉衝上其事詔旌其門

王安鼎字孺和少孤家赤貧母梁責以先世儀節伏臘婚
嫁祭葬必如則小不愜輒詈至累日安鼎必謝免一
切獨居屏息俟少解卽又欣然婉戀嘗秋夜被譴跪庭
中猝遇風雨不敢易處以是苦多病年四十七卒安鼎
博識多聞詩俊逸不羣書法得率更北海意與人交涇
渭了了而處之渾然邑令樊玉衝旌其門曰純孝

李允昌字文長同芳長子萬曆庚子領鄉薦第一辛丑成
進士選庶吉士授編修丁未分校禮闈得士左光斗冠
房壬子主楚試亡何父罷官允昌先期假歸奉養極歡
先是母劉早世允昌念終鮮兄弟請父置媵生二弟及

父遠宦允昌撫育教督備極恩義父俸入所存悉推與弟曰兒幸自立當以是佐兩弟膏火資里居恥言干謁門下士官鄰邦者絕不與通其卹族賑貧一推父意行之父歿時允昌已五十二哀毀過常遂卒長子孟函字三一以恩蔭中崇禎己卯副貢好古樂善邑中稱長者選錢塘知縣未任卒子可衛可汧

陳雲鵬字漢衢其父以他人累坐罪雲鵬請代下獄後得免父歿母病亟籲天求代得痊生平好行善鄉里有善事知無不爲萬曆癸卯邑令樊玉衝上其事以孝義旌許君甫甫里人母龔臥樓上夜半爐火延燒被帳母驚際不出聲君甫聞煙氣急起視於火中負母下更奔入欲

出父棺樓板已穿不能措手足號哭呼天忽樓上水桶斷箆瀉水滅火見者咸歎異焉張魯唯記其事

黃守道車塘農人母病目不治守道以舌舐之滌皆達淚踰月而視復明久之母疽發於背旣裂守道長跪吮之裂處成坎又吮之暗合補瀉法疽亦尋愈御史邢侗聞之給粟帛旌其門後御史馬從聘疏聞旌表

何夢得字原錫祖天衢字道亨以貢官太平訓導性坦易而有特操父存仁字蒼梧與叔其智俱以孝友著夢得補諸生有文譽以貢授徽州訓導未任遭父喪哀毀至滅性竟嘔血死子謙字非鳴崇禎辛未進士歷官有政聲後以僉都御史巡撫昌平移鎮居庸京師陷徒跣歸

皇朝兩縣續修志 卷二十九
拜母堂下以悲憤暴卒

鄭浴日字秩南有孝行年十三縣試立成七藝邑令過周謀賞拔之會父喪過爲治喪具生平學務根柢當貢以母病不赴母亡哭踊成疾卒

奚應奎地區五畝民也父文惠性好施年老不能身其事應奎必勉力以代并推廣父意所欲爲者父病噎日夕含粥糜跪而哺得愈壽至九十餘母王病日至瞽應奎日舐以舌數月復明又病昏暈割股療治之立愈撫按爲之旌其門

張雲龍少有至性母病割臂內和藥以進得愈母卒後刻木肖像旦夕跪獻所嗜萬曆戊申邑大饑疫邑令委以

散米設粥施藥諸事宜大吏旌其門曰孝義又朱應芳尤大中皆以割股愈親疾爲郡邑所旌天啟三年農人呂懋宰母顧病刲左臂煎湯飲母母愈巡按饒京旌之崇禎七年一保七畝民周文鼎母倪痢劇割股療之巡按祁彪佳題旌十二年東亭子農人張重欽字君寵母宋病禱土神祠遇頭陀云生人肉可療乃割脇下肉煎湯飲母得愈往謝頭陀已失所在御史任濬旌之十五年有李峻者兩弟瑛化死母慟絕莫能救峻刲股肉三寸許暈絕於地瑛急取煮湯灌母得甦峻亦甦每直指按部必旌其門稱李孝子

周室琳字韞美天啟甲子舉人弱冠時祖元暉以涇林績

紀一書爲怨家所訐逮詔獄室琳徒步走京師瀝血具
疏草屨青衫日拜長安門而哭臺省交章論救事得解
元暉卒室琳扶櫬南還聞者莫不稱歎出後叔父公績
喪葬而外於所後之貲產俱分給昆弟及妹又立義塾
以誨族中子弟凡戚黨之貧乏者靡不存卹嘗拾遺金
五百雪中停車反諸其人卒年四十三

柴永清字集勳奇六世孫南雍助教堯年曾孫內行篤至
兩割股以療母疾母歿三年不飲酒居內侍父疾中裨
廁踰必親自浣滌妻許亦兩割股愈姑與母之疾永清
少補諸生讀書常至達曙爲文高朗英博纏纏千言與
太倉張采同里朱集璜葛芝最厚善名籍甚長吏皆折

節引重遇公事言無不盡鼎革後數年卒年三十九

蔣紹芬乳名關五歲時喪父天麟族叔天祚素無賴覲紹
芬母龔姿色誘之去而鬻紹芬於大姓老僕顧增贖歸
依其姊以居天祚以他罪發囚甚強龔倚門龔不從筆
挺而死紹芬年十六姊爲授室甫生子集成黨舉觴以
酒酌地大慟遍辭客謂已死期將至自是出必徘徊賓
曦門側一日見天祚與人語遂奮躍抽刃刺其喉仆地
死自投就獄邑令楊永言廉得其實終釋之

蘇賦才性至孝業腐酒養親而自食常不飽父母有不悅
拊其背作小兒狀以悅之侍奉有暇輒讀書至夜分不
倦書聲與磨聲相應和崇禎時卒卒之日猶呼親不置

云

陳楚珍順治乙酉城陷奉母避難流離辛苦母脫而楚珍死

國朝

○葛鑿字穉堅郡諸生順治乙酉七月城潰時隨父錫琬同匿後園兵獲錫琬鑿躍出請代兵感其孝並釋之更護其家後鑿以明經終子雲蓀字天民儒士大父錫琬病亟斷指療病得瘳而雲蓀以創尋卒年二十三雲蓀妻王氏痛夫哀毀亦卒乾隆辛酉旌表

○鄭伯昌字倩文若曾元孫少遊學補杭州諸生父之郊病疽伯昌口吮之目不交睫者旬日母張病危夜叩北

斗求代病愈而目已眚伯昌伺察意指不少離母獲安適弟嗣昌出後叔父之祁乙酉之祁死難嗣昌已前卒伯昌經理其後撫從妹同己女父有羨貲爲葬費者儲於至戚既耗置不問鬻田以葬春和里家廟兵燹傾頽且被侵占力爲恢復修治做古宗法合族會祭闢書館數楹於傍日還桂軒爲子弟講習之所族祖興裔賜塋在餘杭嗣已絕樵牧蹂躪伯昌躬往整飭之悉復舊觀友人顧錫疇宋繼登張采交薦引之堅不就康熙四年卒年七十四子起濂自有傳孫孫枚字漢皋敦行不怠雍正改元 賜冠帶卒年八十七

○支萬春字彙昭運使如璋子母願病瘵割肱額代孝事

皇朝詞林典故卷二十九
繼祖母白終身弗衰弟產蕩盡更析與之撫孤卹嫠贍族靡不竭力歲大祲米石至六七金萬春平糶施粥至鬻產以繼福王時充恩貢順治辛卯 詔舉隱逸有欲薦之者堅謝弗出卒年六十四

○朱肅字力男父尙崇禎間詣闕言時事忤宰執意論罪巡撫張國維將具疏昭雪當國者復移獄淮上諸子聞難不知所爲肅時年十六奮身出門徒行至淮奉父禁所費用絕則傭書販柴以應又以間奔懇諸大僚求釋最後懇河督黃希憲於河涘官舫距岸遠乃投身水中湍急勢將溺希憲急命挽起之肅以頭搶地曰無他求得代父死萬幸希憲感動爲詳閱舊牘繕疏入告得釋

乃奉父歸順治七年補諸生懲父難每自斂鋒鏑然見義必爲尤篤愛兄弟不異財產卒年七十三子立誠

○胡溶時字振安甲桂子四歲時父殉節廣信隨母朱遁跡萬山中旋歸里屢經險難稍長就塾卽立志勵學值歲祲母子食麥糜時相對泣泣已又讀出就有司試爲巡撫慕天顏布政丁思孔激賞竟以諸生老溶時性行純粹事寡母盡孝積館穀所入節縮久之葬先世凡七喪痛父死節失遺骸所在恒頓足西向悲號遇諱日終日不食以爲常又慮家乘散佚蒐輯數寒暑始就先墓在吳縣真珠塢鄰壤闕地脈復竭力典揭以拓之侍御盛符升歎爲貧士所難他如交朋友訓後進遇里黨一

皆以誠相與卒年五十三門人王啓傳輩私謚孝愨先生子四欽銘鏞鏘欽鏘俱別有傳

○何陸愷字公求明太平司訓天衢曾孫幼力學贅於許婦翁歿遺孤亦殤其族眾析產盡而未屢陸愷恥與之爭遂以奩產還之歸奉父爾昇先意承志竭蹶以葬祖父母又葬其從兄昌平巡撫謙順治甲午兄訥領鄉薦陸愷僅得副榜明年訥成進士授太原推官爾昇一往署卽歸安於陸愷菽水之養也賦冊註誤杜門著述書法亦稱於時卒年七十

○王掄春字元之僑六世孫曾祖一恭自太倉來徙掄春早歲補諸生罹世變棄去與弟捷春最友愛門戶事皆專任先人遺產悉予之捷春因病破產復畀以所居屋宇而自遷他所及歿厚其喪葬令次子之垣爲之後生平不以譖詐逆人急人之難常恐不及貸而負者亦不責償性尤孤介貴顯有力之門裹足弗往杜門課子編纂文字以老卒年七十二

○王洄字宛仲志慶次子補太倉諸生國變棄去少負至性父歿事從父志長如父志長以老壽終經營喪葬必誠必信志長孫喆生幼孤貧洄飲食教誨之以迄成立嘗創家社課羣子弟二十年中獲雋者十餘人夙與朱用純厚善每晤對必以學道相勗勉年未六十卒子緝基字亮儔康熙壬子舉人全椒教諭緝徵字次鄭太學

生緝傳字永叔諸生並有志行緝傳曾孫汝楫字濟川性簡雅工詩家貧嘗薄遊京邸一時名流如吳樹萱葉元符褚兆磨輩咸與倡和訂交旋里後族叔鷓方纂中州音韻輯要一書汝楫爲校讎得失已又修輯世譜亦倚汝楫爲重再遊山左歸益安貧守約鍵戶課子以老

○周耀字熙含尚書倫元孫父本宏有聲復社耀年十二喪母乙酉秋城將陷本宏挈家出東關耀之長兄誤出他途其子甫離襁褓乳媪欲棄之耀保抱攜持卒得全初名薇駿遊庠食餼賦册呈誤再以第一補諸生仍受餼生平苦志力學課授生徒隨資引掖無不斐然康熙庚辰冬卒於山左旅塾年六十八學者私謚和定先生

○何宏祚字趾協初名銘邑諸生賦册呈誤復補郡諸生授餼熟於制義源流爲文斟酌古今不矯不隨旣失意秋闈益發憤爲該達之學教弟子抉摘瑕疵不少假借尤敦內行父繩祖以潛山訓導罷歸得惑疾詬詈楚辱其子宏祚服勤備至父怒愈甚責愈厲宏祚飲泣內訟重足而立不使人知也未幾以痢瘵卒年六十三

○劉滋桂字邃深年十五父病夜泣禱於庭忽見中天碧采光耀室廬病旋瘳人以爲精誠所感友愛其兄漢星家政必稟命而行切嗜學尤好古文辭與劉嶠呂熊輩爲各體詩歌葉九淵握蘭社中爭推挹之

○金永晃字華山年八歲父成三疾顛天請代父歿兄晟

客都門家貧不能備棺衾乃至郡謁醫者劉致和請爲
傭取值以殮父後永晃每十日必一歸覲母繼薪水或
傭務不暇夜提燈疾走寒風暑雨弗顧也同里王崑源
奇之還主值攜以歸并妻以女乙酉崑民弗靖兄晟適
歸時已薙髮眾疑爲間將殺之永晃號呼奔救眾見永
晃曰孝子來矣殺孝子兄不祥乃舍之曾孫咸德字惟
周父受宜出外不歸時將昏暮咸德往迎之中途父忽
踣於湖遂奮身以救父生而咸德死

○汪允昌傭書養親日必請所欲手奉甘旨親命之食輒
曰飽矣及父母歿未葬恒臥棺側值亂不去旣葬遇風
雨必至墓所省視同邑張對揚字盈水明給事中棟孫

食餼郡庠居母喪哀毀得疾甫小祥遂卒

○周尙文擔負養母甘滑惟母欲母嘗冬夜思所嗜尙文
衝寒繞城求以供不娶婦暑則臥牀下寒則抱母足母
易怒必長跪俟母歡乃涕與笑俱而起母耳聾尙文出
哀禱於神及歸聰如故

○任遇亨干墩人澱寇錢大肆劫村坊遇亨隨父濟宇出
走寇劫父去遇亨歸呼天一晝夜忽奮躍持雙刀突入
寇隊負父出身被數創腸垂腹外遇神醫得不死乃扶
父避寇嘉定以老又任裕德年十一有仇家來刺其父
裕德冒刃號請仇爲釋怨去父歿事孀母尤謹兄無依
養之終身賑卹戚族無不竭力乾隆十八年旌

○顧仁隆字子豐錫疇孫副使瑩子幼孤事嫡母徐生母孫有孝行既長刻勵學問由諸生入太學屢試弗遇晚喜爲詩朱用純稱其沈深雄越原本忠孝浸淫六籍兩兄早喪撫愛幼弟孤姪備至葬祖父母時芟舍失火仁隆仰天號慟雨降火滅康熙丁巳歲饑捐粟煮賑全活甚眾歿後有司以孝行旌子世孫字德芳任俠有家風○鄭起濂字春陵伯昌季子七歲值鼎革母徐挈之鄉居起濂念父尙城居趣母復入牽衣涕泣偕父出免於難比長母邁危疾刺血疏顙天求代兄起澄不善治生供億無使乏寡嫂無子爲置嗣且授室季弟起源與其婦俱殞撫教其孤籍遺產歲入之贏爲增置其半娶婦後

歸之遠祖興裔祀揚州名宦歲久湮廢率族衆請於學使者檄行本邑有司重立木主更請建專祠於齊禮坊起濂少補諸生有文名以賦冊呈誤遂專精醫理所入稍羸輒濟人凡賑饑濬河諸事必力任之卒年七十一○葉嗣蔚字幼文明侍郎盛七世孫順治十一年父忠仍病篤顙天請代無驗潛引刀截左手小指寸餘煎湯以進病頓起而血枯患熱結嗣蔚以指導其矢乃復故戚黨欲白其事於官堅卻之當順康之際邑中先後刳肢體救其親者柴鳳藻鄭壽王德貞陳熊周邦灝沈廷章張鶴鳴張守禮王仲祥王開先孫慧賢高馬鄭文熹諸人鳳藻字雲章力貧事親父病禱天刳左股煎湯飲父

父夢中聞人呼格天格天病尋愈中康熙丁巳經魁植
品甚端侍兄尤敬愛未仕卒燾字襟海性狷介居郊外
不入城市母病割股以療得痊晨昏奉養一生不懈時
稱篤行君子舉鄉飲德貞字五芝母疾割乳療之尋愈
熊字仲占忠烈淮六世孫邑諸生六歲時母病日夕籲
天求代闕五載又病乃剗臂肉煎湯進尋愈嘗於隆冬
遇溺者於道解衣衣之得生熊年逾艾無子至是夢神
賜白玉環二已而果得一子名之曰珏後入邑庠邦灝
字孟長甫能言卽知父母意向及長遇親疾割臂以療
撫弟姪不異財產戚黨之匱乏者輒周卹不倦廷章字
培卿百美橋農家子亦割股療母疾鶴鳴父敬修以琴

名鶴鳴能繼之兼善詩畫順治初父及母費先後臥疾
鶴鳴兩割臂肉以進得愈士林多賦詩以贈守禮業醫
父年七十疾亟守禮割股肉以進父覺之卒不起母病
痢復剗如前飲之立愈邑令旌其門曰誠孝格天仲祥
母病危篤割股救之其從子開先亦割股以療親疾再
病再割人稱王氏世孝慧賢淞北農家子嘗割臂肉愈
母疾高馬王巷農家子父疾割左臂以進母疾割右臂
以進未幾父母復病兩臂瘡未愈乃割兩股父母既沒
遇天陰剗所作楚輒流涕曰刀痕猶新吾親安往聞者
悲之文熹甫里人母病痢甚劇割臂肉食母痢旋止
○莊覺力耕養母母卒廬於冢側織葦四周不容寢息日

出治春鋪夜歸趺坐如是者三年人呼爲伴娘墳

○潘吳機字士衡真義人補上海學諸生初父孀一妻逐機母子於外時機尙少親爲母執爨滌穢器備極艱苦暇則讀書以慰母而事父亦盡敬父卒感悟

○孫道光溢瀆村人家貧隆冬鶉衣赤足而日必買鮮奉母母以窮愁不欲食輒多方勸慰之盡鮮乃止外歸呼母柔聲下氣聞者多感動

○陳日涖字季莊幼孤事母至孝見母所嗜物雖遠道必市以歸愛敬其兄衣食必共中年喪偶不再娶長齋誦內典年七十三卒子榮棟字松年父治家嚴稍不悻卽泥首請罪婦張亦能曲體親志嘗以少弟故夫婦跪兩

晝夜無怨言生徒修脯悉以奉親與人交不作一虛語臨財錙銖弗苟人稱陳氏世孝而榮棟尤難

○朱立誠字慎幾肅之子七歲讀尙書說禹貢水道指數不爽後師事朱用純務以慎獨不欺爲本補諸生受餼試輒冠軍爲文章原本經術訓詞深厚用純旣沒立誠與諸同學仍月舉講席往謁平湖陸隴其歸著平湖問答紀其事復與同邑王喆生行復七規靜坐至第五日會高子理靜氣靜之說謂如知止後之定靜安是理靜也喆生深然之立誠內行完粹年十四母凌病篤涕泣廢寢食者累旬父沒三日水漿不入口三年不飲酒食內弟諸生毓忠沒撫從子湯孫逾已出生母卞以上壽

終立誠年已五十九盛暑晝夜哀號致疾五閱月而卒
○朱莊唯字道一明禮部侍郎隆禧元孫少補諸生父國
珍字席之人稱篤行長者嚴於教子家貧甚莊唯以館
穀資菽水國珍時至館舍督視課程少不當輒加誚讓
莊唯拱立承指授深自悔責常至隕涕鄰有興作莊唯
驟罹危疾短一足術者以爲言莊唯曰命也彼何與未
幾夢一人伸其足者疾頓瘳與弟宏詒終身友愛無間
邑令仇士俊舉鄉飲年七十三卒宏詒字義宗以諸生
充里選少於兄二十年服勤親側不少異事兄如父莊
唯言啞啞如不出口宏詒慷慨善議論見義必爲嘗糾
其族捐置墓田中歲病劇念兩親未葬慟哭累日病竟

愈得經營窳窳卒年六十八編修王喆生其甥也兩銘
其墓莊唯次子萼宏詒子純暇錫嘏萼子大傳字有成
八歲學爲史論輒能成章未冠試學使招覆太倉以外
籍被黜旋補邑諸生於學無所不窺歲科試必優等教
授及門多知名士大傳性行狷潔戚屬有急難必苦心
調劑於非義毅然不少假借人多敬而愛之以歲貢選
高淳訓導未赴卒

○顧松字以青規言矩行工書法未冠爲童子師數學有
方中歲僑居嘉定以地近上海就試補諸生後以母老
歸里奉事惟謹又十年母臥牀日多松不暫離左右或
勸赴省試弗應母歿不復事舉業庶弟璞貧甚爲買墓

卷二十九
三
旁田俾力耕自給卽官稅亦不令輸又時時存問空乏撫其子如子配朱亦以賢孝稱長子臣尉字遂良諸生母疾革悲痛發狂卒孫均諸生有志行早卒

○沈彥璋字瑞文西鄉古塘人六歲時侍父天祿病不暫離會白腰寇黨劫斂鄉村奄入臥內時舉室驚避彥璋獨跪泣請哀寇義而釋之康熙庚戌邑被水災彥璋覓粟飼親而自咽稀粥旋隨父之金陵父夜墮江奮身救之得免父歿母周病鄰家失火彥璋急負其母出入扶柩而勢不能舉乃哀號守柩側火竟熄家貧投徒自給母歿後遂廬墓以終長洲沈德潛爲作傳一時名公卿題贈盈卷軸焉子某彥璋繼妻唐出也割乳以愈母疾

○顧禹亮字端侯原名麟父需誠爲仇家所陷制府飛騎勾攝禹亮知父必不免乃匿父他所挺身被逮至江寧銀鐺數匝蒲伏轅門自問無生理忽制府暴疾卒獄乃解間道歸省其父節儉治生甘旨娛養析箸時公產盡歸兩弟復歲時推解以終其身卒年七十子濤

○曹維屏字藩侯父貞字瑞白善音律從蜀撫之蜀卒於茂州何士司家康熙庚寅冬常熟人朱若采自蜀中來述瑞白凶問維屏號慟走冰雪中足腫不能行山東賈人見而憐之與之乘至大邑已卒歲邑令王國璋亦崑山人乃以情自達於國璋國璋爲感動留度歲維屏固辭道出飛沙嶺風起沙飛中之輒死且多虎維屏子子

書夜行至新繁合爲若采主人贈以金逾六關始抵茂
州謁何士司述顛末淚與辭迸何慰留三日發骸納囊
中負而行坐臥不離盜疑其囊尾而欲劫之既知父骨
歎曰真孝子真孝子乃散去歸葬崑山

○顧存儒字通侯潛五世孫幼有至性七歲喪父錫庶辟
踊不欲生每祭輒嗚咽終日不食母朱憐而止之一日
自塾歸窺母面有淚痕失聲一慟幾絕待兄友愛尤至
父棺未葬夜半鄰居失火存儒襪被裹母負之出隨偕
一傭舁父棺而力不勝叩頭號慟願以身殉俄而反風
得無恙母年六十將捧觴適病存儒默禱於天願減已
算以益母壽病尋愈又十年乃卒存儒後舉鄉飲卒年

七十二雍正五年以孝行旌子登

○王迪惠字禹吉進士元臣從子少多病不能習舉業父
疾躬親湯藥夏亢旱井泉皆涸父病熱必凉水乃可解
暍迪惠烈日中從庭隙掘之未三尺忽得泉甘洌逾常
進飲數四疾乃痊雍正初以孝行旌從孫路字天衢
孝事祖母好學工文爲諸生早卒

○朱鳳字儀九庠生襁褓喪母六歲就傅聞講丁蘭故事
淚泫泫下求母像祇事之父病虔禱北辰父忽醒語鳳
曰頃夢神謂余以爾虔禱故增余壽十齡矣繼母何戒
殺好施鳳每從別室中烹鮮以進終身弗懈撫弟妹曲
盡恩意年五十二卒雍正七年旌孝

○張士任字奉恬居雪莊里父文元醉臥仇伏床下將割以刃士任年十三忽心悸剔燈見刃遽以身當之延頸號泣仇感動鄰刃而遁父娶後母性卞急疊加洗漬士任下氣柔聲母化爲慈鄰居失火逼寢舍倉皇負父出復冒焰負後母及幼弟俱得免雍正中旌孝原志作士仁誤

○汪宗灝字天來以諸生入太學甫二歲值兵燹母抱避匿僻所宗灝竟日無聲乃免弱冠出贅婦家設饌常不下咽必婦餽致翁姑乃食父病漉溺悶危甚宗灝惶急罔措跪吮之漉下而愈既失怙恃膳母側二十年未嘗與妻子同盤餐也卒年五十八雍正中旌孝子中鵬別有傳中鵬字立山諸生敦行力學與元齊名雍正丁

未徵舉孝友端方乾隆丙辰舉孝廉方正並不赴

○胡鏘字成積溶時季子幼孤貧年十六卽課徒自給時諸兄俱遠出鏘敬事寡母歲祀自饜糠粃供甘旨無闕母朱中風臥牀兼患痢鏘扶掖保護夜恒數十起中翊廁踰親爲洗滌迨兄欽宦達或諷往依鏘曰吾兄廉可更以衣食溷兄耶生平攻苦績學由太學再試棘闈不遇挾策遊燕趙歷蜀滇歸卒子開基懌堂彪佳並有文行懌堂字孝標幼負行誼隨兄幕遊兄病保陽不起懌堂廢寢食奔走得持喪歸奉嫂撫姪並周至性介特而救患卹難如弗及後客楚北以遠祖宋儒安國墓在當陽境謝館鬻產恢復墓田數頃築垣勒碑以紀未幾土

豪仍攘之懌堂憤甚郵書判家事自述生平爲訓子遺
規言自此從赤松遊矣後遂不知所終開基子焯字瞻
亭年十七以勤讀失明遂精星卜晚歲名益著軍門王
柄郡守任兆炳咸禮遇之邑令寧貴稱之曰儒林日者
○徐麟字蒼來明贈太僕少卿汝龍六世孫廩貢生世濬
子年十三出贅每省親不命之去不忍去壯歲與兄凌
雲同補諸生母周病危麟跪向北斗晨夕叩禱復密疏
於神廟減己算以益親壽母病尋愈待諸兄疴瘵如在
己身於宗戚間解厄濟困如不及卒之日哭者皆失聲
年止三十二乾隆初以孝行旌

○嚴漢鉦字鳴甫居渡頭里年十三隨父舟行過吳淞風

起舟欹父失足墮水漢鉦奮身投水以鄰舟救免迨父
病劇醫藥不效乃半夜入神祠請命及歿三年中進饌
侍立几筵不異生時事母葉壽至八十六旣葬日至墓
所瞻拜風雨之夕哀聲動遠近乾隆初以孝行旌

○朱光遠字星若本紫陽裔從父居崑之星溪年十一父
疾祈天請代及歿柩歸過錢塘江風濤驟作舟幾覆光
遠跪且泣期以身殉竟得渡母青一目晨夕舐之浹月
復明生平好施予尤喜修葺橋梁道路卒年七十七

○顧晉錫字全九世居常熟軍墩其父始遷崑山晉錫早
喪母稍長讀詩至蓼莪章輒掩卷飲泣師問故對曰不
忍讀無母何恃句耳父患風癱飲饌皆跪進溺器廁牕

中夜提換不入已寢者二年一夕若有人呼之出驚起
聞室中摧裂聲急呼父醒負而趨不數武棟梁折矣乾
隆初以孝行 旌

○吳聲九字鶴皋性至孝自幼無私蓄有則輒市果餌供
父母及長奉養益力親疾日夜籲天求代躬親湯藥目
不交睫者幾半載迨歿泣血毀瘠哀動路人乾隆初
旌孝同時鄭隆祚者祖母病刺血書疏籲益算痛父不
逮養或於道路間感動輒長號仆地卒後有司旌其門
○浦湘字霆若父裕鉉居車塘家僕與一病道流爭毆俄
道流死里豪喬莘者冒道流爲子誣裕鉉主使搆成獄
僉發陝西時湘五歲裕鉉抱以授從兄英選日是兒非

兄莫保英選卽以爲後育之湘六歲讀書晝夜不輟念
父母嘗嗚咽不成聲年十五補諸生三十舉於鄉禮闈
報罷遂間關入秦省父於神木堡居兩月復走京師匍
匐公卿門求所以還其親者會開納贖例諸憐湘者競
捐金助之遂得迎父母歸雍正丙午 詔舉賢良方正
有司以相應堅辭不赴乾隆元年 詔舉孝廉方正當
事復屬湘辭不獲將北上蓮丁兩艱服闋 召試以知
縣用初署雄縣補高陽釐剔陋規事無大小不假胥吏
手蒞任六載惠績甚著卒於官年六十一卒之日貧無
以殮士民爭先賻贈柩歸涕泣而送者數千人

○王崧字天申任用六世孫曾祖煥以行義著於鄉崑城

拒守時煥以情語守門者得啟民從之而出者數百人
父詩始自城徙千墩里性好善嘗還遺金拯溺者崧居
貧事親必具甘旨親飯輒穴壁窺之親喜則喜偶弗懌
卽食不下咽父憐之慮其弗給乃潛遣人自外至稱親
戚餽遺者以博親歡日置百錢以脩親需外舅家吳橋
每過從未嘗一宿或強留之曰吾在外如二老人何父
好飲詣親朋燕會必親自迎候不任僮僕曰吾父性嚴
若輩不足任使令也曾若祖兩世未葬父常以爲念崧
盡出所有刻期襄事年僅三十五卒弟大倫字宗五與
兄共敦孝道崧亡敬事寡嫂不忘課崧子荃讀書砥行
俾成立年六十五卒荃自有傳

○錢儒瑛本姓許字渭修祖某繼錢後故姓錢居邑之高
橋里少習舉業兼好騎射連試有司不得志遂棄去父
病叩天請代割左臂肉和藥以進父飲之甘復活數年
母病割右臂大創血流仆地若有人掖之而起儒瑛身
既窮復痛親不逮遂不娶妻而爲弟某授室曰先人得
有後吾願足矣性和而介不苟取生平未常有誑言晚
究心內典年六十三卒又休甯人張元會居千墩里兩
割臂肉以療父母肩葬三世竟以毀家又程發篋人子
早孤事母邵孝以負販謀朝夕母病叩天求代割臂肉
和藥進之尋愈又張曾三六行橋人力耕養母母病割
臂肉和藥進母飲之而甘病尋愈又朱定觀角直人操

舟爲業母早沒事父尤孝父病常割股以進踰年父沒
哀毀致疾死又宋球官家迎薰門外幼爲叔所撫叔病
割臂肉進之遂甦

○周渭世家子備力養親兩兄授室有子遂不娶父歿侍
母寢處宛若孩提未幾母亦歿喪葬皆取於備值憐兩
兄貧不使分任也年六十餘卒余起霞爲之傳

○戴高字楚山居東墅事母至孝工書善醫邑令王湖維
重之題其居曰玉峯高隱年七十六卒子勗倫事高亦
以孝聞平居每食必侍側高卒於木主旁侍食終其身
出必告反必面焉年六十餘卒

○張子焯字潛文考授州同知父病日夕向北斗祈代潛

割股製藥飲之得瘥事母尤辛勤盡力性好施予漆工
祁天章四十未娶子焯予之金勸使娶天章受金而道
遺明日子焯過之察其容甚戚詰之不肯言詢其鄰始
知之乃復其金如前畀之曰爾有遺乎金固在也其他
好義多類此同里葉均禧長洲彭紹升俱立傳表之子
其燠字廷友善寫墨蘭得馬天錫指授其燠子大鈞字
孟和諸生孫觀瀾字錦濤餼於庠爲名諸生

○陳元模字燦辰居千墩鎮績學砥行日取近思錄自課
性至孝父喪廬墓三年母邁危疾元模籲天哀禱願減
已齡一紀活母母果瘳又十二年卒郡守陳鵬年以賑
饑識元模薦之巡撫張伯行命肄業紫陽書院上書條

陳備旱潦興水利緩逋欠定漕例累數千言悉見採納嘗蒐羅吳淞左右地理人物作淞南志伯行序而行之子雲煌字啟南邑廩生學行有父風輯有淞南續志

○陸之濱字濟卿少隨父世楨遠遊行次常州遇盜欲刃其父之濱抱持求代得釋父卒事祖母朱母王益孝謹同祖兄之滌避難離散之濱訪歸友愛終身卒年七十四乾隆十八年 旌從子嘉博字宏輝性純孝父病顛天請代母病割股以療待兄姊極友愛鄉黨稱之乾隆十七年 旌

○錢文楨字周士以高第生餼於庠屢赴省試不售遂謝去諸生兄文湛以游幕卒於榆林之府谷文楨跋涉數千里往收其遺骸途遇盜疑有厚裝劫之去與其僕楊四號呼奪歸母患疽日舐五七次至愈乃已居恒沈靜寡言與人交不設城府年八十餘卒兄贊見藝術

○錢涵字毓功甬里人諸生羈卯時盜劫其家索涵父宏聲不得嚇其母張鞭箠交下涵從旁哭罵盜感動而去父喪哀毀骨立事兩繼母並得歡心以病咯血早卒

○吳常字質夫父德斌字國書家世居城南少從呼谷遊補金山衛庠生教授生徒有法以老壽終常年十七父患目盲治弗效常跪而舐之數年得復明有田數十畝父憫其支持勞勩盡與之常堅辭仍與兄弟均其授產券有云自今既盲之視皆出次兒常孝思所致常刻意

向學補諸生兩親喪葬後廬墓三年始歸朔望必往省
拜一日大雪瀰漫誤墮水若有掖之起者人咸以爲孝
感乾隆己卯學使李因培旌其門妻王氏相夫理家盡
出奩具供甘旨侍姑疾惟謹亦以孝聞

○曹起鳳字士元父子文自徽州遷崑山賈於蜀久之有
蜀客來知子文已死而弗詳其地時起鳳年十六將往
求父骨貧不能行長洲潘爲縉贈以百金屬其叔代往
無所獲起鳳既壯念父益悲痛爲縉復贈以金乃歷豫
秦至蜀書帖於背歲暮抵酉陽雨雪踏臥土穴中有項
許二生見之曰孝子也掖歸留之度歲進酒肉謝曰不
見父棺誓不食此是夕夢經荒原一叟與數人坐林中

笑語起鳳曰月邊古蕉中鹿兩壬申可食肉覺而識之
偶偕二生過荒原有棺纍纍起鳳以夢告二生就傍近
徽人胡某詢之曰十年前鄉人曹氏殯於是試求之棺
皆有題字一棺獨無白於官啟棺見骨漬血驗之而祀
有牙牌文曰蕉鹿起鳳曰是矣月邊古胡也蕉中鹿牌
也二生爲設祭以餽肉食起鳳曰子來時日在壬申今
兩閱月又值壬申夢盡驗矣起鳳哭拜謝負骨歸里母
見牙牌泣曰此而父取繫牡鑰者也諏日葬之朱瀝村
旣葬月必再三至灌所植樹至老不倦卒年七十二
○葛李琦字與常明太常錫璠元孫郡庠生天性沈篤父
松郡廩生吳陞患心疾醫治罔效琦乃中夜籲天剖股

肉煎湯飲之病尋愈子修齡字兆九官高陽典史嘗佐其令保障官堤免水患

○陳夏字仁洽崑邑甫里人母目盲夏每日以舌舐之歲餘復明家貧藉修脯養親父好施默喻父志而曲成之親沒廬墓側於所居別構一室懸親像出入必告如生存卒年七十九乾隆壬午年 旌孝

○孫泰觀薛家埭鄉農也幼孤成婚逾年妻產一蛇而殞乃歎曰今而知母之恩矣遂不更娶以備賃供甘旨或食以肉必以遺母有知之者先饋其母而後食之乃始食嘗以錢易米歸米中獲銀半錠亟還其主曰銀非我物也我不汝還恐累及僕婢耳

○陳朱組字佩黃太學生性至孝父病籲天嘗糞父尋卒奉母棺合葬時舟行遇風搏額祈天風定獲濟督學梁國治旌之曰風作徐沈

○朱茗字斯盛顯宗元孫崑諸生力學有守尤敦內行妹適王氏嫠而貧賜卹之終其身弟諸生升卒撫其二女資嫁之雖屢空弗顧也始祖直秘閣子榮墓在常熟練祁塘久被侵占茗竭力恢復之以宗譜散佚手自繕錄精覈有體要秉性方嚴從遊者少弛閑檢必嚴飭接之者莫不肅然卒年七十四子謬臣字翊昌府庠歲貢生○張承基歇馬橋市人也妻早亡母鄒氏寢疾承基侍左右不解帶者十五年與母同寢呼之卽應母好飲酒必

宿儲以待凡母之裙袒廁喻承基與其子分任澣濯終
母身不怠後其母十九年而卒年七十四

○黃桂字學文泖川鄉人父渭濱以事戍蜀數歲夢父告
以病劇驚而寤卽日徒步往中途病痢幾死至爲人傭
役抵戍所父已前卒乃函骨歸時乾隆五十二年也

○趙峭字慎徽崑山附貢生居眞義事父吳皋母王怡怡
色養不異孩提友愛兩弟太學生景暹終身無間言年
垂九十卒乾隆庚戌邑令王應奎詳請題 旌建坊子
時字敏來幼稟至性父疾篤籲天請以身代父愈而時
果早卒道光己酉 旌銓字有能附貢生亦孝友尚義
如父兄

○湯瑚字燧輝邑眞義人補新陽諸生有文名母病痢劇
籲天求代且嘗糞以驗休咎母愈而瑚竟感疾卒

○呂廷彥周巷農家子幼孤事母至孝家貧甚而遇時果
鮮品必竭蹶購取奉母寒冬輒侍寢婚後十餘年如一
日年未四十而殞不及終事其母閭里哀之

○顧之振字聲玉岳州丞濤從孫生九月父國勳亡母沈
苦節撫育得成立母病劇割股肉以進又嚙指血繕疏
籲東岳祠願減算一紀益母壽母果逾十二年卒

○程上珍居迎薰門外賣蛋爲業母病劇潛割臂肉煮湯
以進得愈自是盛暑不解中衣恐其母知之也

○沈臣福字廷選一字藍珍古塘人孝子彥璋元孫定邊

縣知縣述子性謹厚孝友母張孺人早喪時時悲念事繼母朱怡顏柔順乾隆庚寅父遠宦陝西諸叔隨侍臣福留事祖父母辛卯正月家人不戒於火火及後樓爲繼母朱及父妾孔氏寢室時夜半臣福驚喊救母上樓覓母負至梯梯焚奔前樓見孔抱幼弟越窗躍下亦急將扶母越窗而母已隨孔先躍煙迷火烈窗焚梁壓臣福竟死年十九歲

○葛峻道字際天高陽典史修齡子工書法事親以孝聞由給事內閣考授八品職補山東登州府經歷攝萊陽縣尉以協平土豪有功攝萊陽縣事清理積獄修大成殿因公虧賦額降調黃山巡檢黃山當登萊孔道會逆

匪王倫叛鎮帥帥師過境軍書旁午擘畫鈎稽應給資糧晝夜不休賊平檄緝羽黨脅從多宥所轄海口二一爲龍口一爲黃河營例嚴商舶偷渡然于法者大抵貧民乏食禁之太酷每自蹈海死乃嚴飭船戶而陰寬其約黠民宋義爲惡鄉里痛懲之竄跡他往北馬鎮東萊山廟道士雄於貲勾通奸民掠婦女多爲不軌請兵五十人捕獲申解復經歷職攝福山捕務得士民心以病病告歸生平篤於友于以祖遺宅讓弟而自賃屋居修輯宗譜創母黨源流考識者謂得仁人孝子之用心云乾隆五十三年卒年六十六道光元年旌子常旭自有傳常吉字景陸崑庠生父宦遊山左常吉奉母在家

母病兩次割股肉和藥進尋愈迨親歿授徒郡城最久
教弟子先品行而後文藝晚宗陽明學有得必錄題其
冊曰六皆隨筆道光中 旌常吉子石安孫振聲俱新
庠生振聲能詩

○徐癡失其名幼孤事母孝家赤貧無以爲養乃以其意
創爲小調或節曲本一二以爲歌徧走街市人稍稍給
之錢則市甘旨歸奉母母偶不悅必歌烏烏以侑觴厭
其狀者遂目爲癡云嘗鵲衣百結搖擺作搢紳先生態
或抱胡琴或時脫帽縮雙髻作花面了頭戲市中兒擲
揄之輒嫚罵不肯罵人母曰若母卽我母有招之往歌
者稟於母乃往暮卽歸或留爲長夜歡終夜不安去則

每向主人索果餅以奉母後娶婦瞽者亦能事姑有欽
其孝者訪之家徒壁立問癡何在則跪破襪上其母方
啐嗟作聲有怒容婦亦慄慄無所措爲之歎息而去母
歿癡不知所終

此嘉慶時人邑人戴溶爲立傳

○王學浩字孟養先世太倉望族高祖賓始遷崑山學浩
有孝行生六歲父國華卒哀毀如成人母朱氏撫之成
立少從進士陳嘉炎游學有根柢補崑庠生乾隆丙午
舉於鄉累上春官不遇主周侍郎興岱家最久侍郎視
學廣東勸校得公明譽運河道策丹延至兗州書院晚
年以母老不遠游館吳門劉氏著毛詩說二卷燈窗雜
記一卷書無不工篆隸古勁直接秦漢真書從歐入褚

晚探二王之秘行書得瘞鶴銘筆意堅蒼渾厚自成一
家詩則如詩錄自序非深於詩者不能道隻字乃皆爲
畫名所掩嘉定令吳桓集杜句書聯贈云白也詩無敵
褚公書絕倫其推重如此嘉慶末歸崑山畫名益重山
水師王原祁花卉法徐熙皆得神似居恆奉母至孝先
意承志年踰艾耆猶作嬰兒狀以悅母母壽九十四而
終學浩年已七十四擗踊哭泣喪葬盡禮盡誠迺臚陳
母節孝請旌如例平生束脩自好以嘉言善行表率
鄉人如修崑新合志建節孝祠設義學立啟善堂皆爲
首倡又工醫術唾手奏功年七十九無疾而逝

吳縣石韞玉有傳

○徐雲路字企萬明太僕卿應聘八世孫父慶堂字以升
庠生母吳氏有肝厥病疾作危甚雲路默禱於天刲臂
肉和糜以進越宿稍瘥旬日大愈延壽十餘年而歿雲
路少爲諸生有文譽詩宗晚唐填詞出入兩宋爲古文
疎落簡峭嘗賣田作秋闈旅費舟夜泊燕子磯朗誦所
作賣田詩鄰舟聞之問何人雲路亦出詢乃知錢塘袁
枚也亟具衣冠執弟子禮請受業論詩良久而別吳中
盛詩社雲路館吳門久時與唱和手輯邑人詩成集題
曰玉輝編道光末張潛之潘道根所刊崑山詩存多本
之青浦王昶致政歸選湖海詩傳引雲路相參訂善畫
梅蒼勁秀逸人爭寶之以明經需次廣文道光甲申卒

官制兩縣續修志 卷二十九
年六十八咸豐初旌孝子三人友愛無間言皆工詞章伯子鳳采尤精筆札游幕善詠諧以廩監終年七十仲子鳳翼授徒邑中門下多知名士增生卒年七十一叔子鳳岡亦諸生通聲韻精填詞詞梓行二卷善畫梅似其父性放誕嗜酒揮霍不事生產以佗僚卒年五十餘

○李鏞字敘東祖棟江西廣信府經歷署貴溪縣事有惠政父宗海監生母葛生鏞及鑑卒繼母陳生五子父卒家中落鏞敦內行兩遭大故喪葬頻仍孝事繼母友于諸弟一身堵柱或無端受譙責默自引咎絕不語人幼承庭訓長從吳映薇游奇其才以女妻之爲文必宗先

正法精於說理補新庠生歸安姚文僖視學江蘇獨賞鏞文謂能於江西五家外自張一幟歲科兩試皆冠曹餼於庠十赴省闈不遇慨然曰古人云士得一知己可不恨吾一生坎坷得遇姚學使亦可無憾矣壯年悼亡不再娶周流授徒教子義方與人交外和內介未及克貢以涇疾卒於道光十三年十一月年五十五以子清鳳官贈光祿大夫刑部右侍郎弟銓性清介少孤奉母教授鄉里課暇躬親執爨飲食寒煖皆先意承志母卒撫棺一慟幾欲身殉平生不與分外事不取非義財爲鄉里推重以督修文廟及分司賑飢出力議敘縣佐卒年七十一

○杜紹哲字宣譽事母孝能得歡心兄弟析居嘉慶己巳母在仲兄家紹哲日必往定省臘月廿四例祀灶放爆竹鄰仲兄居不戒於火紹哲夜半忽驚寤知之急往視母火延及屋冒火入適母蹣跚繞榻負母出火而屋卽塌歷人以爲孝感道光丙申舉鄉飲戊申邀旌典卒年七十五子三人鼎新增生能詩工書善學窠大字葑新庠生出嗣兄後彙亦以庠生中道光壬辰副舉署青浦訓導刊杜氏家譜繪火林負母圖名流題咏成冊梓行建先人忠孝祠奉遠祖忠烈公松及父紹哲晚年欲修邑志未及徧采而粵匪至兄弟俱歿於鄉

○唐長亨字克明孝廉方正德宜元孫議敘八品銜父其

蔚諸生遠館於陝西長亨隨侍讀書父得中風病幾殆

長亨年十四禱於神剖股兩次以進病遂愈侍父回里

踰半年夙疾發得歿於家人以爲孝感

○徐文炳字淇園居巴城鎮少孤貧有至性藉館穀養祖

母及母母程善病遂棄舉業習醫祖母病日以舌舐之

未匝月日復明每晨必問兩堂上安所嗜物價雖貴必

買以奉夜必侍祖母及母卧乃就寢與人交無欺語遇

貧者送診兼濟以藥里有善舉必爲之倡母卒文炳年

六十號泣如嬰兒閭黨咸稱其孝道光十一年舉鄉飲

賓當路獎以德尊桑梓匾額旋經督撫學政彙題請

旌孝卒年八十一子煥亦以孝行聞

邑人張潛之有徐孝子傳潘道根有

徐孝
子記

○王光泰新庠生父萬春府庠生母馮氏光泰五歲失恃事繼母陳及陸唯謹曲意承歡稍有不愉輒伏地引罪俟容霽乃起父足疾發具酒食加豐延執友與談讌俾樂而忘疾之苦當鰥居每勸再娶或納妾俱不允乃買婢侍之父曰吾得汝夫婦侍奉不自覺老鰥也父病篤衣不解帶食不甘味憫其勞令睡終夕坐帳中間反側聲則早侍立床前及卒哀毀骨立附身附棺必誠必信執喪三年不居內不飲酒悉遵古制每遇春秋祭奠必躬親年近八旬夫婦齊眉子七人皆成立僉以爲孝德之報云

○孫鑑字仲金崑監生祖崗乾隆庚寅舉右科父恩埏附貢生母吳氏患咯血醫藥罔效鑑聞古人有顛天假年之事乃私刺指血書疏禱天願但存執喪之年餘年盡以益母又恐已年不可必用唐陳藏器本草拾遺人肉療瘵之說潛剖臂肉投湯飲母母食大進病遂痊又五年卒鑑先母卒年二十一歲豐初旌

○王春濤新陽人父文蔚患咯血因禱天減已算以益親卽於是夜剖股肉煮藥以進父病漸痊明年父卒春濤哀毀骨立誓不欲生閱四月亦卒年三十二唐培沂亦新陽人年十六母張氏隄患傷寒病危甚培沂夜跪中庭默禱卽抽刀剖左臂肉投藥以進母飲之精神覺爽

逾宿遂愈又高壽十年俱咸豐初旌

○徐寶琳字禹珍崑監生刑部尚書乾學五世孫父家鼎候選從九母葉氏寶琳事親孝敬兄信友侍母疾衣不解帶數旬病篤潛剖臂肉煎湯進母聞香烈異常飲之而愈後遭母喪昏迷中若有人謂之曰汝當早夭因剖股療親已增汝壽父暮年有愛妾寶琳或受委曲隱忍不令父知其將順親心多類此事兄寶成無失禮人有以父母事乞告者必竭力勸其志臨財不苟有擅貨客商失其發票值千金寶琳於路拾得急覓其人還之年四十七先父卒道光二十八年旌

○支蘭字芳九新陽芥區人監生嘉慶九年母王氏患痰

症危篤默禱請代割左臂肉投藥飲母越數日大愈子榮監生母華氏患咳喘症榮跪禱叩頭額盡腫割左臂肉和藥進母服之尋愈母壽至六十一既而父蘭患痢疾不止氣息僅存口眼俱閉榮跪禱如母病願減算以益親又割左股肉入藥飲之越兩日全愈父壽至七十孫以善布政使司理問銜母龔氏患肝胃氣病勢危急以善侍奉不稍離剖左臂肉投藥進母復禱神減算以益親母飲之肝胃氣痛止俱咸豐初旌

○徐金鉉字漢鼎崑山安亭鎮人後遷蓬閩幼失恃事繼母孝多病又綜理家政遂棄舉業然好讀書經史能通大義督兩弟寶章玉瑛從師力學皆游庠課徒師範甚

嚴中年父得咯血病醫治無效金鉉乃割股療父取血
書疏願以已壽益親將股肉煎湯飲之遂愈父壽果延
一紀而終所遺產悉讓兩弟人稱爲孝友咸豐初旌
又顧嗣昌年十九割股療祖母疾以孝聞

○王經寶新陽顧墓村人業農母早歿年十八父宏業得
痼疾飲食醫藥唯謹旦晚籲天乞以身代父疾篤醫曰
弗治鄰里問病者咸在經寶入慰父出祈醫淚泫泫下
見者皆憐之夜左右無人一燈熒然跪藥罏旁顧視床
上人氣息僅屬心如刺又念死母愈悲恐傷父心不敢
哭出聲嗚咽久之則起立趨厨下右抽刀斷一左指血
淋漓墜城間裏創以指和藥進父久病胃槁格格欲吐

慰父曰強飲此愈矣然父竟不起

旌

本

○朱玉祥字在岡監生候補州同知性至孝躬自炊爨養
親或憫其勞玉祥曰視膳問安人子常職高年氣體尤
易違和委諸他人或違親志必躬必親庶幾安之鄰里
戚族有急無不調卹中年築墳建祠並奎星閣書廳爲
兒孫輩誦讀所待師傅有加禮子晉蕃恪循父道孫曾
遊庠者甚衆道光十八年閏四月卒年七十五旌
○葛邦楷字揆章新庠生有孝行喪葬悉遵古禮祭祀事
亡如存嘉慶中父爲陝西韓城縣典史其弟妹俱殤於
關中邦楷徒步至陝負骨歸人共稱之工書計楷法得
魯公筆意算學與同邑張序均遊喜講究西法晚年館

於六合而歿

未旌

○蔡鎡德字松岩先世居青浦之陳莊村父莘愚有中表姪朱姓母寡貧不能守携往浙莘愚慮朱姓無似續訪得携歸年尚穉教育俾成立鎡德兄弟四人居其季兄星奇幼爲陸氏養子旣成立而陸氏父母亡不容於族歸二老俱存兄弟已析箸鎡德曲體父母心曰兒習貿遷陳墓鎮請以所分田產半及青邑分授之舊屋悉讓之由是鎡德買宅陳墓鎮徙居崑山境幼隨長兄器成學業器成中落家計一身肩之器成死經營喪葬事不以問其子性好施如其父嘗遇故交陸某於途察其貧苦狀慨助以營生本勉勵而別越十載陸某業日隆率

子造門拜德家人始知其事其陰行善類如此告貸親友錢貨雖歷年久必統權子母親往歸之無絲毫負早歲得怯症屢瀕於危年四十始得子病亦痊治家嚴肅儉約布衣終身皓首齊眉道光十九年舉鄉飲賓卒年八十三子澂字淥泉監生性長厚治家行善能承祖父志爲鄉里推重卒年七十九

○王壽柏字繼貞新庠生父樹芳母金氏壽柏幼有至性年十七喪父號慟幾不欲生家故貧授徒里中供母膳母病危刲臂肉和藥以進迨母卒喪葬盡禮哀毀一如喪父時常顧影自憐曰鮮民之生不如死之久矣見戚友具慶扶杖授几歸卽慘然不樂晚年教子以義方暇

則聚書卷植花竹自娛喜讀岐黃書儲良藥以療病者
九赴省闈卒不遇處之夷然歿於道光三十年年六十
二旌子飛熊右科舉人周莊汎千總加守備職以巡防
堵禦功加都司銜賞戴花翎親疾亦割股以孝聞年五
十九卒旌

○陸再吉幼孤事母吳氏以孝聞嗜酒輒醉母戒之終身
不復飲母嫌溺器不淨躬親洗滌三十年如一日習米
業每出營生歸必遺母甘旨日爲母搥背摩癢或口講
小說娛親一日妻不順母立出之一年後感悔而返鄰
里聞之無敢拂其親者母壽至七十八再吉亦七十歲
卒旌

○王文光爲人廉靜端方接物寬和慈愛以孝稱其執親
之喪期年不沐浴三年不茹葷閭里咸欽其孝道光己
酉大水災鄉之飢民每食必分其半食之親族稱貸者
皆周濟卒年六十又傳乾五歲喪母終日對母柩號哭
不思飲食踰月卒旌

○顧之楷字思則世爲崑山望族父國瑞母周之楷自幼
敦孝行家貧資館穀事父母極歡父卒哀毀幾滅性補
弟子員屢試列優等中道光甲辰舉人一上春官不第
歸而母卒哀毀如喪父服闋或勸之計偕惻然曰毛義
色喜爲親在也今縱得第亦何樂遂不復出待親族雖
疏逃敬愛有加授徒四十年得其指授先後皆成名邑

中諸善舉每力任之年六十一以心力交困病卒未旌
○陳燮字理元年十七應縣試爲邑令傅璋識拔補新庠
生邑有和聲文社燮每構一藝沈思獨往常屈其坐人
歲科試輒高等道光甲辰舉於鄉燮篤於內行筆耕爲
養能悅親心父荼疾篤侍湯藥衣不解帶兩閱月及棄
養哀禮兼至事母及寡嫂各盡道撫兄遺孤如已出族
戚有無力從師者招至家教之不能舉喪營葬者爲之
經紀有友爲其戚爭產繫獄松江知燮與知府有舊懷
金請居間怫然曰是將浼我哉峻拒之道光三十年卒
年四十三同時張念典字茲甫新庠增生籍硯田奉甘
旨能先意承志亦以孝聞誠篤好學喜行善歲饑嘗積

館穀資爲不飢丸以食餓者與人交切切惓惓終始如

一其教子弟亦然咸豐五年卒年四十四未旌

○支是悼性孝友家乏中人產恆典衣飾以供親膳有所
需必預備或親意拂督責之必長跪順受長兄早世事
嫂如事母服用壹是必擇精者奉之終身如一日周卹
鄰里解衣推食雖無擔石儲不顧也未旌子南樾南金俱
庠生

○柴殿綸監生少孤遇春秋祭祀輒哀慟事母朱食飲必
自調治徹膳必請所與母好施囊錢米羅列寢室備濟
急用日潛益之不使母知也年二十娶婦有日因母疾
作更擇吉嘗念市肆中藥多悞人準古良方手親炮製

母服之即愈有餘施貧者亦見效母疾亟禱於神願身代及歿伏地哀號水漿不入口數日晚年介鄉飲卒年七十九

同治九年旌

○陳錦居舟直歲貢生受益子少孤事母沈以孝聞母患癰勢將病廢錦家貧辭遠館借鄰舍聚徒以養親日必歸省數次母年六十九病傷寒醫云不治乃潛割左臂肉煎湯進尋愈越六年錦先母卒臨歿猶以不克終養為憾年四十一

旌

○吳之伉廩生良濟子歲貢映奎孫有至性賦質聰明九歲讀五經畢十三應童子試十六母氏徐病篤醫藥罔效之伉焚香對天默禱割左臂肉煎湯奉母飲之愈年

十九卒人咸惜之

旌

○趙錫晉字康侯真義人父慰曾早世依祖蘭以居及祖年衰多病侍奉湯藥不離左右夜不解衣而寢如是者累年鄉里咸稱其孝祖歿哭踊盡哀絕而復甦道光二十九年冬卒年三十餘又王學書業醫咸豐庚申七月祖母葛氏在方塘遇賊匪傷臂潰爛將死學書默禱於神割股四次和湯藥進之

旌

○顧漢秀字雲巖庠生事親孝母陶氏病半載不交睫及危割股療之愈妻陸氏亦篤於孝又庠生周慰曾亦割股療親以孝稱俱同治九年旌

○王爾康字純嘏父師棟目疾肝氣作卧不起爾康侍湯

孝友

旌

藥衣不解帶兩月臨終命之曰汝兄爾泰資稟太弱不能治生產家務汝一身當之謹護汝兄我目瞑矣父卒奉母及兄嫂孝友兼至母晚年病半身不仁扶持抑搔事事躬親三年餘如一日兄患傷寒昏迷不省人事焚香默禱願減算延兄壽疾果瘳終身同居兄兩女一子為之婚嫁門戶雖獨當然必稟兄命乃行好施濟於患難孤寡尤慷慨樂助同治三年四月卒於申江旅舍未旌

○朱春旭字啟東居北鄉丁涇村性孝順父病瘋手足不仁春旭侍飲食問煖寒撫摩抑搔不離左右父歿哭踊盡哀事母益謹家業農中歲忽發憤讀書積三千餘卷庚申燬於賊誓不蓄髮恆以敦倫紀明順逆訓其村人

○戚友來避難讓屋居之寒衣飢食不使乏同治元年冬卒年五十四未旌

○錢錦霞字雲裳居菜區南五畝家世業儒兄綱諸生設塾授徒錦霞習賈善居積有至性摒擋門戶一身任之不以累父兄父母或怒責怡然順受母病篤割股肉療之年未三十卒未旌

○金榜元字仲瑜婁下人諸生父世佑病危榜元禱北斗割股肉煎湯飲父尋愈越十二年卒榜元胞弟榜奎亦割股愈父疾未旌

○章大與弟章二不詳其名以序行俱業鑷工大友于性成二不檢於行所得錢兄弟分貲竹筒米鹽日用大獨

任之二私其筒猶苦不足大窺得其意佯以已錢誤入弟筒以足之二病咯血大出錢令就醫二糜其錢詭述醫言謂病無庸藥但多食肉可愈大乃日煮肉啖弟有許其弟之過者必爲之諱有妹嫁行商常依大居大妻與不睦大曰妹吾同胞妻何爲者弟今有子吾何妻爲遂出之終身不復娶二忽感悟愛大甚大出歸或晚二與其兩子候伺之常相望於道里中有諸生某事母有違言大語人曰吾不意秀才如是言之訾欲裂呼之鐻獨望望避之不某應年四十餘卒

附義夫

未旌

○杜邦楨字周望新陽增廣生年二十九妻沈氏亡男在

襁褓女方毀齒邦楨教而兼養終身不更娶不置妾年五十九卒又陳商珍年二十四喪妻王氏無出嗣姪長觀爲子嘗謂男子執義與女子執節同然義在我者也視女子從人亦有間幸而有子知我他日不擠溝壑斯可已矣遂不復娶卒年六十又馬慶餘字惠卿年二十三妻喪誓不再娶道光二十六年卒年六十六嗣子璘俱同治九年旌

崑新兩縣續修合志卷二十九終

崑新兩縣續修合志卷二十九

文苑一

宋

龔程字信民宗元子剛正自守憤聖道不明力排異端家
 不設佛老像祭祀不焚紙錢讀書支硎山之南峯先墓
 下攻苦食淡博極羣書記問精確鄉人號有腳書厨登
 熙寧六年進士歷西安丞知桐廬縣卒贈左朝議大夫
 子况字濬之崇寧五年進士第與蘇元老俱以學術文
 章名於朝時號龔蘇用宗元中隱故事自號起隱子終
 祠部員外郎朝議大夫

袁宗仁字壽卿父鰲字可久紹興十二年進士宗仁以文

名於鄉登隆興元年進士仕至國子監書庫官弟宗魯
嘉定特科姪惟寅中鎖廳應西捧鄉書逢午禧祐七年
由太學奏名主安吉簿

邊愔德字公辯其先楚邱人樞密直學士贈兵部尚書肅
四世孫曾祖調福建轉運使贈開府儀同三司子珉始
居姑蘇珉子靜遷崑山卽愔德父也愔德幼孤至孝貧
不廢禮才思敏給以詩名嘗與范成大唱酬成大有敢
向詩壇挑老將之句以連五薦就奏名第三仕舉員及
格會舉將坐累失改秩年逾六十致仕儒林例改宣教
鄉達列上其行特改通直郎所撰有脂韋子子瀛字道
卿開禧進士與弟濟並有學行濟子應升應登應升字

子用篤志操履爲一鄉師表連捧三薦禧祐初特科進

士丹徒主簿應升子雲遇字龍光寶祐進士江陰尉

呂伯奮字忠甫幼有才名登禧熙十一年進士與其弟仲

堪叔獻皆中童科名公賦詠甚多

楊應龍字汝濟系出關西曾祖敏求仕徽宗朝官至朝散

大夫徙居崑山之外岡應龍才兼文武爲戚里吳郡王

婿寧宗朝授武功大夫浙西兵馬鈐轄暮年丐祀主管

建寧府冲祐觀所著五十萬言名曰進授冊嘉言讜論

發於忠忱手鈔六經百家之說爲性齋知見錄凡三十

卷又有性齋詩稿王袞黃由皆以將帥薦之未幾卒子

光輔終承節郎孫滋生有神異歿於邊功理宗贈護國

惠忠侯廟食里中

凌萬頃字叔度博學多聞淳祐中邑令永嘉項公澤重之請與邊實同纂玉峯志期年而成邑之有志自茲始登景定三年進士終直學

郭章字仲達幼工詩文遊太學有聲嘗作詩留別同舍有中原百蠻知誰運今日分陰敢自閒之句識者憫其志操以薦官至通直郎卒於京師年四十餘無子

邊實字宜學愷德曾孫雲遇弟少與兄明及雲遇俱父應升自訓專門業經明以禮經連捧三薦雲遇登進士乙科咸淳六年實已預解額以寫題小誤被擯歸先是實與凌萬頃搜訪邑中典故成玉峯志至是乃復辨證前

書以所見聞爲玉峯續志攝令長沙謝公應序而行之元

范國雋字彥中仲淹九世孫早遊庠序卓然異等延祐二年集賢院大學士潘昂霄薦於朝曰國雋蔚爲令器見謂通材德行可以淑人文章可以垂後觀其學術不墮家聲當今國家需賢有若而人誠宜錄用國子監考校所業中程擬於山長學正內區用始仲淹葬洛陽自靖康後道路阻絕者幾二百五十餘年至大己酉國雋自吳詣洛展拜墓下凡道塗遠近風物異同皆形諸吟詠號詣洛集

衛培字甯深涇曾孫性端恪博通經史前代典故問無不

知延祐七年郡府以培充貢試龍虎榜賦文不起草人
謂有楊馬才時雖被黜識者推之知州王安貞聘訓導
州學號月山先生與同邑李季高並以著述稱

姚文奐字子章聰敏好學過目即成誦博涉經史爲縉紳
所推重辟浙東帥閫掾雖公事旁午不廢吟詠把酒論
詩意氣豁如家有書聲齋野航亭自號婁東生

郭翼字義仲少入鄉校從衛培學培深器之既壯沈潛百
家尤邃於易爲文辭必欲追古作者諷誦思繹雖一字
不苟會稽楊維禎嘗評其文可以方軌西京家貧不肯
干謁自號東郭生與俗寡合有力者多不肯薦以訓導
老於學宮嘗獻策張氏勸其反元季貪殘舊政乘時進

取若晏安逸樂精銳坐銷四方豪傑並起吳爲必爭之

地勢將不保士誠怒其言切直欲殺之其妻固諫得逸

去及卒盧熊題其墓曰遷善先生

原註按盧熊志翼卒於至正二十四年七月未嘗入明新府志采列朝詩集謂洪武初徵授學官怏怏而卒殊誤

王舉之軼其字有學行生平多著述至明時僅存梅花詩

一百首鄭文康亟稱之

顧德輝字仲瑛家世素封輕財結客豪宕自喜年三十始
折節讀書購古書名畫彝鼎秘玩築別業於茜涇西曰
玉山佳處晨夕與客置酒賦詩其中四方文學士河東
張翥會稽楊維禎天台柯九思永嘉李孝光方外士張
雨于彥成琦元璞輩咸主其家園池亭榭之盛圖史之

富暨餼館聲伎並冠絕一時而德輝才情妙麗與諸名士亦畧相當嘗舉茂才授會稽教諭辟行省屬官皆不就張士誠據吳欲強以官去隱於嘉興之合溪尋以子元臣爲元水利副都萬戶封德輝武畧將軍飛騎尉錢塘縣男母喪歸綽溪士誠再辟之遂斷髮廬墓自號金粟道人及吳平父子並徙濠梁洪武二年卒明德輝別名阿瑛甫踰四十悉以田付子若壻築園林於所居之西卽玉山佳處也馬鞍山有宋劉過墓爲僧徒占據德輝率郡人弔酌白有司復之在嘉興自題春帖云三生已悟身如寄一死須教子便埋晚歲賦詩云此膝豈因兒輩屈壯心寧受酒杯降嘗自爲壙志卒年六十元臣

字仲衡詩筆俊爽能世其家次子晉字進道好讀書貞素自守能詩尤擅書法又德輝兄仁之子佐字翼之亦以詩名

明

盧熊字公武觀之子元季爲吳縣教諭張士誠據吳辟爲掾洪武初以故官迫遣赴京母卒告歸卜築馬鞍山陽薦授工部照磨以善書擢中書舍人闕歲遷兗州知府時兵革甫定民生疲瘵麗於辟者咸從輕典武臣將兵道竟欲致伎樂拒卻之太師李善長營魯王府又浚河自克至任城役夫幾二十萬熊竭心調度事集而人不擾俄以簿錄刑人家屬事坐累死年五十熊素精篆籀

之學嘗疏言州印篆竟譎類袁上以爲無禮至是竟得罪生平不治生產旣死籍其家惟餘麻桌上深悔之少與弟熙皆從楊維禎遊博學工文詞嘗纂修吳郡志窮搜極訪遂爲一郡良史子彭祖字長嬰洪武末任武康丞承樂初薦授禮部主事坐事謫阜城爲民尋徵詣行在冠帶聽用以疾卒彭祖幼傳家學有用世才惜未盡其施彭祖孫瑛字克修宣德五年進士授刑部主事早卒性敏學博工古文篆籀尤善寫竹夏景每語人曰吾墨竹一派近在玉潤瑛蓋景之壻也

秦約字文仲玉之子元至正間官崇德州教授洪武初應秀才舉試慎獨箴第一拜禮部侍郎以母老辭歸再以寶鈔束帛徵詣京師上疏乞復書院書堂義學及舊守令之選自立一科年四十者用涖職百日舉以自代郡邑三年造冊與志書同進以備國史採擇上以約年老授溧陽教諭御史練則成待制吳沈薦約宿學遺老合在館閣不報在任八年乞歸卒約文章務求理勝兼工詩自名其居曰鶴塚張翥貢師泰楊維禎尤推重之袁華字子英少穎悟不羣讀書一二過輒記誦不忘工詩尤長樂府與顧德輝友善其家所藏書畫悉經品題洪武初爲郡學訓導後以其子爲吏被罪坐累卒於京楊維禎嘗序其可傳集云吾鐵門稱能詩者南北凡百餘人求如山陰張憲及華輩者不能十人

項駕字叔馭博涉經史精春秋工詩能文洪武初應秀才舉擢禮部郎中調官廣東政治廉平有聲於時

傅勳字次泉父翼嫻吏事勳去吏為儒早從盧觀遊得聞性理之學觀愛其勤以女妻之領洪武四年鄉舉為會

稽丞

案府志儒林傳傳勳鄉舉作進士

楊性字秉中祖伯振父慶源皆儒官性博聞強記能詩從楊維禎遊才思敏贍維禎以小鐵呼之嘗構一亭曰草

元日鼓琴觴咏其中洪武初由秀才舉知祁州病卒

陳則字文度家貧力學僦屋授徒以師範聞工詩與高啟徐賁張羽楊基輩倡和為北郭十友之一嘗賦紫菊一

時傳誦呼為陳紫菊洪武六年以秀才舉任應天治中

進戶部侍郎以閱實戶口調大同府同知就遷知府

偶桓字武孟家於桃源涇築室曰江雨軒嗜酒喜吟嘗贊

其詩謁楊維禎倪瓚瓚亟稱之謂有超乘挽強之力日升川至之漸洪武二十四年應秀才舉為崇安從事授

廣西桂林河泊大使荆門州吏目罷歸年八十二卒

丁晉字仲敏洪武中謫戍莊浪永樂時選為肅府校尉能

詩與吳江鄒奕吳縣沈繹為倡和友詩文甚多居蘭州日久與繹及錢塘楊志善俱以齒德見重補金城三老

史謹字公敏世居婁東早從倪瓚高啟遊性高潔博學好

古工詩畫甫冠從戍滇陽洪武末翰林學士王景薦授應天推官左遷湘陰丞以事罷僑居金陵自號吳門野

樵卒年七十餘

案顧志及畫史纂要列朝詩集史
謹字皆作公謹原志作公敏恐訛

夏景字仲昭世居邑之太倉父亮字伯亮善寫山水育於
舅朱氏冒其姓景貴後始復姓景幼從司訓盧從龍學
年十五從龍以國難將被繫景誓死隨之以計隱匿從
龍得免歎曰今之孔融也以兄景成弟景從坐奔走營
救脫其難登永樂乙未進士選庶吉士會修大典詔集
善書者各書以進特取景第一命書諸宮殿榜授中書
舍人賜第宅免朝參眷顧極隆初景字作昶上曰日豈
可從旁宜加永上爲更定之仁宗登極學士楊榮奏取
直文淵閣宣德間陞吏部考功主事仍典文翰正統初
預修仁宣二廟實錄陞食五品俸久之以侍郎曹義薦

出知瑞州府政尚平易修學校增廩餼建秀文樓以勵
諸生勸課農桑安良禁暴吏治肅然景泰中入覲遷太
常少卿進正卿年七十致仕又十三年卒賜葬迎鐘浦
景天資秀朗七歲工楷法九歲時教諭周暉嘗引見提
學御史范敬先命句屬對大奇之性寬厚樂易不事聲
譽而風流文雅有高人之致詩詞清麗尤工畫竹石擅
名天下至於朝鮮日本諸國皆懸金購之長子承事郎
鉞讓蔭於季弟鎡補光祿寺署丞次子鐸字文振以字
行一字德聲以善書爲中書舍人終大理寺右寺正
王資字之深宋少師淮之後洪武初自金華徙居崑山甲
子里資性凝重清飭孝於父母才品爲時所稱通易學

永樂癸卯領鄉薦宣德間以乙榜授浙江武康訓導陞翰林院孔目滿三考以薦陞檢討當恩典及父母資捧之色喜讀書勵行益勤其政孫億別有傳

衛靖字以嘉性謹厚工詩洪熙初以能書薦授中書舍人

直文淵閣陞吏部

劉鳳續吳先賢傳讚作禮部

主事預修宣廟實錄

孫熙字光績宏治乙丑歲貢授象山訓導終黃陂教諭

費信字公曉永樂間詔中官鄭和使西洋撫諭諸番夷發銳卒二萬三千餘四十有八簡文采論識之士顯一策書備上清覽信首預選由東吳海墘開艚歷廣閩諸島凡四十餘邦計程八萬自己丑至宣德癸丑歲踰二紀信每蒞番城輒伏几濡豪紋綴篇章標其山川夷類物

候風習諸光怪奇詭事以儲采納題曰星槎勝覽邑人

周復俊爲刪析附玉峯詩纂行世

沈與字孟溫邑之太倉衛人洪武中坐累謫戍金齒宣德初歸省墳墓鄉人以其經學該博留教弟子與時年幾六十日已昏終日危坐與諸生講解經書章分句析微詞奧義多所發明後還雲南以太倉自學宮西遷設兵衛儒術久不振其後文學日盛皆與有以啟之今州學宮卽其五經授徒處也

屈昉字季恒才情侷儻讀書不事章句嘗從軍崇明寫懷寄遠詩篇傳播爲廬陵楊士奇所知士奇問崑令羅永年季恒安在永年不能答士奇曰君尙不識屈昉耶永

年有慙色心識之還縣適詔舉經明行修之士遂以昉
薦授南海縣丞久之乞致仕未果卒官孫祔

陳助字賢佐皞從子少從鄭文康沈愚輩講學論文里中
號為十鐸助最有清才工長短句精率更書法旁曉古

今篆隸摹秦漢印章又能寫喬柯竹石正統初以薦授
桐廬縣丞歷知新淦金谿二縣有能聲自免歸卒子諫

字敬言以貢授堂邑訓導天順中葬父於馬鞍山北鳳
皇石下遇唐姚仙客妻張氏墓為文祭而掩之避三尺

為穴文康聞之曰真吾門士也原註文康嘗自言少時
有友十人日以倡和講
學遊從為事當時呼為十鐸方言鐸猶癡也至為十鐸
詩其後皆有官或為聞人十人者沈愚及弟魯自有傳
其一即助周敘字叔倫以貢官主簿張謙字克讓以貢
官知縣夏佑字存賢以薦官鑄印大使沈祥登進士官

參議黃琚呂穆皆隱居不仕琚孝廉鐸之子也又文康
妹婿周號工篆隸及畫梅凡文康探奇弔古事皆佐之

盧儒字為已熙之孫學問該博文師韓柳書法歐顏自負
甚高或請其文稿輒捧腹曰彼中有笥卒難相盡天順

初以薦授中書舍人時被顧問嘗在翰林上命撰雪賦
甚急儒援筆立就上深器之

陸欽字鼎儀居邑之太倉衛少與張泰陸容齊名號婁東
三鳳舉天順癸未會試第一甲申憲宗即位殿試第二

授編修預修英宗實錄遷修撰侍皇太子講讀欽教納
詳懇禮度莊飭皇太子屬目稱善滿九載擢諭德孝宗

立進太常少卿兼翰林侍讀充經筵日講官修憲宗實
錄以疾歸詔給厨傳越歲卒年五十賜祭葬官其子爰

中書舍人欽爲人端肅凝重持守清介學究淵源爲文章周密雍裕詩調卓絕平生憂世愛國未嘗一日忘懷爰字子引負才喜聲詩與毛澄陸伸等稱七友忤劉瑾致仕瑾誅起原官遷禮部主事

張泰字亨甫本姚姓曾祖瑞代晉陵張某戍太倉衛遂冒其姓泰登天順甲申進士爲庶吉士除檢討名聲籍甚陞修撰踰月得暴疾卒年四十九泰生而秀穎性坦率無厓岸然憤世嫉邪酒酣耳熱談論多激烈獨喜吟詠所著滄洲集李東陽序之稱其縱手迅筆衆莫能及晚乃更爲沈著高簡之辭蓋將及於古人而不意其遽止唐元薦謂宏治間藝苑以李懷麓東陽張滄洲泰爲赤

幟蓋當時李張並稱云

黃雲字應龍太常卿子澄曾孫子澄原籍分宜當靖難師入京時率妻子微服至蘇州與知府姚善倡義勤王善印造黃冊編其子籍崑山子澄殉節後其季子澤字彥輝壻於張卽雲祖也雲少從沈魯遊家貧好學嘗就藏書家借錄卷帙甫畢心口了然凡刑名錢穀水利算數軍旅儀制無不究心期爲有用之學宏治中以貢授瑞州訓導嘗廷謁監司耻之輒欲解組去時邵寶爲提學劉璣爲郡守皆待以殊禮屢慰留之丁外艱歸遂絕意仕進雲爲文得眉山遺意一時碑版之作以出其手爲重然非其好終不與喜獎成豪彥訓飭子弟恐不相盡

而性方嚴見後生輩冠履不率或談笑喧闐輒瞪目叱視顧鼎臣既官宮寮雲遺書勉之謂臺閣儲材須飭經綸大畧於天下事乃克有濟世俗豪華易至消歇必以正法眼看破某見尋常陷溺者滔滔故特相飭冀銘座右側爲戒也年七十餘卒

王同祖字繩武御史復曾孫父銀博學好古能詩工八分書兼善山水竹石同祖少孤善病嘗匿帷中閱司馬通鑑疾起悉了其義弱冠舉正德辛巳進士選庶吉士授編修同祖既績學有聞讀書中秘益事宏博六經子史外陰陽律厯山經地志靡不記覽爲文操筆立書融暢爾雅稱合作大禮議起與張孚敬異者死徙斥逐以百

數同祖亦在遣中孚敬卒始用薦起原官爲春坊校書遷南京國子司業上疏請教世胄又請以薛瑄從祀孔廟庚子九廟災上言春秋哭災漢氏變服今詣陵題土宜比日中反虞之義不得吉服從事又言宗廟藏主石室謂之宗祏公羊高曰主藏廟室西壁中以備火災宜鑿石爲埴藏主其中以應古制識者服其精覈無何諸生坐頌厯失儀宰臣震怒旣免祭酒又欲盡奪其諸生同祖力救乃免已又上疏言他事忤旨落職卒年五十五同祖通籍三十年立朝僅五歲未究其用人共惜之晉憲字邦彝一字其章父鷗字凌霄以貢官宣平教諭憲八歲父授以尙書左傳及馬班諸史濂洛關閩之說能

盡通之嘉靖癸未成進士授工部屯田司主事時張孚敬枋國命二子從憲受尙書絕不與暱權關荆南荆南故孔道萬貨所集憲冰蘖自矢於政府無所餽問以疾在告三年補虞衡司主事營建慈寧宮謹物料絕干請政府滋不悅晉本司員外郎命甫下兵部失火將延燒工部署憲捍禦節慎庫銀鉅萬論者詞連憲謫嘉興通判吏部擬改南員外命且下忽中格會台州有寇警殺其守遂遷憲知府事憲自免歸年八十二卒子驥字子良孝事其父修植桑果種橘千章發明軒岐之說作傷寒辨論數十篇歷滇遼中都幕官學者稱櫟菴先生顧夢川字禹祥夢圭弟性磊落好讀書父潛愛其該達悉

以所藏書與之廣軸高函每覽必盡首尾客至相與揚其推古今兼訂訛謬焚膏繼晷未嘗少倦性復善飲酒容溫克談論以時處父兄金紫之間泊無所營晚歲貢入太學棲心元理寄興澹漠歿後門人私諡淳靖先生子允暉允烈終身不異財以孝友稱從子允杰少孤從諸兄學恂恂如處子中萬歷壬午舉人知偃師縣稱循吏梁鳴鸞字九章紈子與兄鳴鳳齊名鳴鸞好讀史做古論贊體作史論四十卷凡數十年而後成所至必以自隨一時學者爭師尊之嘉靖初以貢授黃岡教諭浮江迎學使者至青山磯風波大作舟幾覆鳴鸞攝衣危坐惟問從者史論在否在黃州嘗有藩臬數輩造賢舍執弟

子禮甚恭鳴鸞故未嘗言某某爲門下士也罷歸貧甚
時顧鼎臣在政府恒道念鳴鸞家人度其必不欲往乃
托他事入舟旣而覺之指河水自誓家人惶遽返舟所
著書歸有光爲之序門人秦鰲嘗欲梓行未果而鰲卒
王綸字理之偉貌修髯喜吟善畫爲長洲沈周入室弟子
尤工篆隸楷法闕里重建聖廟東撫以禮聘往穹碑大
額皆出其手嘗預修武宗實錄所居城中隙地數弓種
竹數十竿篆題之曰君子林翛然自得不慕榮利黃雲
爲作君子林記

吳中英字秀甫一字純甫生而奇穎好讀書父爲置書千
卷恣所欲觀童年入鄉校師事黃雲爲古文詞試輒高
等縣嘗召役其父中英抵書縣令方豪豪年少有文學
莫可當意覽書大服引與遊甚歡性豪爽父卒遺貲甚
厚中英視故券有不能償者悉焚之事繼母備極孝養
好以聲色六博自豪傾其家久之折節自矜飭然不肯
爲龔龔小儒令有知中英者欲有所贈遺及見中英竟
不能出一語平居與其徒考古論學雖先儒已有成說
必反覆其所以不爲苟同兼精風鑑或在四體或在神
情或在文藝無不奇中所獎許多成佳士李憲卿歸有
光皆於未知名時預以遠大期之嘉靖辛卯中英始舉
於鄉年四十四矣試禮部復不第遂屏世事營城東地
藝橘千株鬻以自給雖古文詞亦戒絕惟令兒女環侍

誦詩而已戊戌下第歸疾作及家而卒年五十一

鄭若曾字伯魯文康元孫幼有經世志凡天文地理輿山經海籍靡不得其端委婦翁魏校最器重之嘉靖中以諸生入北雍闈中擬元者再竟不遇倭擾東南總制胡宗憲辟為贊畫偵知倭不諳地境導之者為內地奸人以計間之寇遁敘功授錦衣世蔭不受歸而著書薦修國史不就歷與王守仁唐順之羅欽順王畿茅坤王艮歸有光諸人研摩實行不角立門戶為空言無補之學所著書皆切實經濟不以文詞為工也

陳時字子行十歲能文語多豔發嘉靖癸卯學士華察典試南畿置時第二意猶未愜曰留對大廷放此人出一

頭地明春下第益下帷發憤務為沈博絕麗之文察見之愕然曰將母病耶楊子雲作太玄何必令一世人不好也未久疾卒年三十九次子延經字懷龍篤學勵行如其父以諸生終孫二期楨其柱楨子用極俱自有傳陸洲字宗瀛少負異才詩文重海內勲戚徐魏國欲延於塾費幣數往返終不就與從姪梓俱以才望著稱二陸先生梓字子材居陳墓其祖曷字汝輝宏治初嘗倡義學延師以訓內外子弟梓倣儻有大志領嘉靖癸卯鄉薦與同籍王世貞袁尊尼以用世相許再躋春官絕意進取終身不入城市不問生產遠近高之

曹治道字君明少治易會提學御史以禮經督諸生乃奮

然改習期月遂以禮經薦高等既而同習者若方元儒
張憲臣輩先後登鄉會薦治道終不遇積修脯買田築
室於葛叢之里爲宵人所搆中以徭遂大困或勸以謁
貴遊可解治道不以屑意教其子昌期孫銓鑑卒能世
其家學邑中之以學禮稱者實自治道始

鄭若庸字中伯早歲以詩名吳下趙康王聞其名幣聘入
鄴王父子接席與交與詩人謝榛埒學士程敏政延至
都嚴嵩父子聞其至以鏹幣招之不赴仍返鄴王爲庄
供帳子宮女及女樂數輩若庸乃爲王著書採掇古文
奇字累千卷名曰類雋康王薨去趙居清源年八十餘
卒同時吳擴字子充能詩亦以布衣遊公卿間避倭亂

居金陵築長吟閣於秦淮以老

張自新初名鴻字子賓家新洋江口性方簡無文飾資真
絕異古經深奧不可了者應口講論無疑父喪家貧母
勸其勿讀書自新涕泣長跪曰父命也與其兄耕田養
母兄爲里長每遇催科受榜掠自新輒詣縣自代而匿
其兄他所縣吏怪其意氣方授杖輒止之曰而何人者
自新曰書生也試之文立就慰而免之嘗荷笠負擔雜
行城市間或過其友吳中英歸有光家弛擔入縱談天
下事已仍擔而去授徒他所每歸省爲其母具酒食兄
弟酣笑以爲樂補弟子員學官索贖金甚急自新無以
應欲棄去未幾卒自新爲文博雅有奇氣初時人無知

之者有光以示中英中英好獎士類而許可者甚夥顧獨稱自新其卒也中英買棺葬焉

沈世麟字明甫愚孫少有俊才爲文率意口古勃勃有風雲氣與吳中英周鳳鳴齊名中英嘗稱其有高行多奇節尤豪於飲與同社季龍伯稱社中劉阮不屑當世之務藏書千卷少涉則束之曰吾神遊其間矣嘗髻髻祖跣行吟於市里人目爲狂生家貧以書抵縣令假擔粟令笑與之卒年四十二龍伯字子升居楊巷嘗過故相王鏊宅與歸有光方元儒誦壁間都穆壽序二千餘言還家錄之龍伯訛二字有光多脫誤以意改竄愈善龍伯曰吾正苦不如熙甫忘耳時乘醉讀書至達旦試輒

高等卒不遇生平多隱德人莫聞知既死而人頌之

俞允文字質甫一字仲蔚父璋字朝相正德辛未進士終南京大理評事允文十二而孤家貧奉祖母及母事兄撫弟以孝友聞十五爲馬鞍山賦援據該博者俊器重之尋補郡諸生好爲詩歌古文詞兩母繼歿謝去諸生遂一意讀書著作直規古人兼善行楷絕無凡筆同邑張寰偕之赴茗上詩社所至推爲上客王世貞意不可一世以汪道昆故識允文折節與交列諸廣五子之首由是名日起徐中行張佳胤後先使江南無不造廬請謁中歲患頭風終歲不至公庭有不可已者僅於舟中一報謝而已都穆嘗謂崑山有三絕仲蔚詩熙甫文子

賓舉子業無所用吾手矣歿後世貞誌其墓

梁辰魚字伯龍泉州同知紈曾孫父介字石重平陽訓導以文行顯辰魚身長八尺有奇疎眉虬髯好任俠不屑就諸生試勉游太學竟亦弗就營華屋招來四方奇傑之彥嘉靖間七子皆折節與交尙書王世貞大將軍戚繼光特造其廬辰魚於樓船簫鼓中仰天歌嘯旁若無人千里之外玉帛狗馬名香珍玩多集其庭而擊劍扛鼎之徒騷人墨客羽衣草衲之士無不以辰魚爲歸性好遊足跡遍吳楚間喜酒盡一石弗醉尤善度曲得魏良輔之傳轉喉發響聲出金石其風流豪舉論者謂與元之顧仲瑛相彷彿云

王逢年字舜華同祖子志性奇逸年十四通三經補諸生射策南都賦弔古詩題洪武門關吏大喧引去不顧以倭亂挾書北遊值楊繼盛忤嚴嵩論死叩獄門納交又賦大哀文哭東市嵩怒甚乃走居庸關問流沙訪道王屋作王屋山人自狀後謁袁煒於政府煒以故人子厚遇之令草應制文字有所更竄逢年上書言閣下以時文得第以青詞得相惡知天下有古文哉不辭而去及渡淮困於旅人淮陰人魯道者李夢陽弟子也徒步追及資之以歸輯其所著海岱集王世貞爲序盛相推挹逢年顧指摘王李詩嗤爲俗調或輯東漢文誤入其所著天祿閣外史益自負以爲當吾世得追配古人也生

平允工諸體書時稱小王右軍年七十五無疾而卒
王伯稠字世周其先常熟人移家崑山父冕字元肅嘗官
參軍築精舍於虞山下與王寵友善俱以蘊藉風流著
稱吳中伯稠少隨父入京師見城闕戚里之盛輒有歌
咏時號神童王世貞在刑部請與相見曰故是吾輩人
以順天籍爲諸生尋謝去東歸閉居僧舍常經月不窺
戶詩名大譟好事者爭相傳寫置之中盛間莫可識辨
則又務爲擺落抒所得爲快對客無寒暄語而獎成
後進惟恐弗及或遇蹴踘檮蒲鬪雞走馬飛丸站履之
戲無弗諦視令有述於世與王逢年爲中表兄弟其依
隱傲世畧相似卒年七十三子約字開美亦能詩

沈孝字敬甫博聞強記邃於經學師事歸有光去有光所
居安亭江數里有疑必相質或乘夜徒步詣其門有光
就寢亟進之聞數語輒大快而退偶讀易乾坤之旨深
思未得乃登埤凝望俯察仰觀恍然有悟有光評其文
如璞中之玉沙中之金市人所以掉臂不顧也門人周
詩顧懋宏輩勸孝應詔冠帶爲進青袍革履孝晒而受
之終不御子松年字伯奮有續馬鞍山志
陳敬純字吉甫德清教諭斌孫好學負膽氣能爲淹博藻
贍之詞學者爭來請益敬純援據今古千言俱下降慶
初貢入太學大學士張居正作拱日樓成有客請敬純
賦之署客名以進居正訝曰故有五經庫其人耶客以

敬純對居正諷選人以翰林孔目相處敬純謁選時衣
紗衣偃蹇堂下遂授儀封主簿諸監司目爲江南名士
待以賓禮而敬純每用詆語傲睨之尋罷歸於所居須
浦之南陔草堂鑿池種樹稍置亭榭與親賓觴咏以老
傅遜字士凱嘉定人徙崑山萬厯間以歲薦爲嵎縣訓導
遷建昌教諭選傅河南王告歸遜儀觀修偉喜談兵明
習世務尤嗜左氏嘗仿建安袁樞紀事本末體作春秋
左傳屬事自公穀暨張賈劉翟杜預而下數百家無不
纂集以類相從每書一事始終離合一覽可竟讀者便
之家素封蒼頭百餘人興至或小試勒兵以行其意時
同里陳可言字以忠撰春秋經傳類事與遜書相似而

遜獨傳遜孫沖之字孝轅萬厯癸卯舉人官知州

張應武字茂仁情次子與兄應文字茂實弟應志字茂良
稱三傑師事歸有光務窮根柢自成一家上述六經下
鉤諸史抵掌論古今人物山川阨塞兵農戰守之事皆
若身在其間嘗慨三吳水利不修操小艇出沒太湖吳
淞間著水利論三篇一時公卿與縣宰咸造廬詢訪嘉
定令韓浚曾延修邑志爲通人所稱從子定安字仲慧
十五補諸生以文行著太倉王世貞兄弟忘年與交工
五言古詩清遠有致以羸疾天死

周詩字以言在從子風致逸爽重然諾以詩名吳下嘗遊
武林匿僧寺中提學孔天胤雅負知詩閱岳鄂王廟題

壁諸詩命隸人簪墨掃之至詩所詠乃大驚往訪與定
交武林人爭延致詩詩不憚辭歸主皇甫氏初詩父佑
精醫術與虞山孫艾善且死屬詩曰常熟可久居居必
依孫氏詩老無子旣病艾子耒具舟迎之遂死耒殮而
葬之孫氏吾谷墓旁表曰虛巖山人周君墓皇甫冲銘
之孫氏子孫歲時祭焉詩承家學妙於方藥作內經解
鈎致元旨不襲前人偶至京師遊公卿間試醫皆神驗
欲以尙醫官之拂袖歸

顧允默字茂仁夢圭長子爲文根柢理要宏瞻該博浮沉
諸生間恂謹如處子恥談先世功闕遇遊冶貴介輒障
其面不與通病垂死聞子天竣及第索筆賦詩而瞑天

竣字升伯弱冠領鄉薦與金壇王肯堂友善相砥爲沈
博絕麗之文萬曆壬辰以進士第三人登第授編修累
遷左諭德奉使朝鮮辛亥春墨察典罷歸天竣讀書多
超悟以藝就正者每經點竄爛然成章卒年六十七

張士淪字心父僉事寬孫父廷臣字元忠幼警慧隨父之
任錢塘署災亟取印潛抱而出有詐稱臺檄者從旁立
辨其非時甫八歲後以諸生入太學爲增城湛若水所
知領嘉靖戊子鄉薦久之不第卒士淪少工詞賦嘗爲
上舍生與海內賢豪士遊再歷秋闈遂一意幽討隨所
覽涉務窮其奧必令了然於心手然後滿志於世味泊
如也以家難傾其橐惟擁先世千卷自衛已又獨肩賦

員外郎 卷三十
三
役困甚乃僦屋留都至不蔽風日爲賦七歌又賦樂元
樂元其所自號也詞旨悽惋讀者悲之留曹有知其才
者爲買田以贍益敷文析理無虛晷時借詞客冥搜石
城牛首棲霞烏衣諸勝俠骨益堅詩律亦更細尋以哭
母過傷修歲祀歸道邁疾卒年四十三子棟文柱自有
傳張氏自新城令能以下有三張先生遺詩僉盡寬有
歸閒集孝廉廷臣有玉山草堂集士淪有張心父集俱
棟訂定棟文柱並有集凡七世八人爲邑中士族最
沈曾唯字達之弟曾魯字得之同居黃潭里才名相埒每
試互爲先後積廩各三十年曾唯以歲貢曾魯以覃恩
同薦於朝曾唯授永康訓導兢兢奉職不以寒羶貶操

遷武進教諭歿於官曾魯抵掌談笑目無前人非義所
出斬如也以未得發抒志氣意常怏怏先兄卒子一源
字元澄通知二父志自奮於文章知名於時婦翁李某
以孤相屬授以鏹一源堅弗受士論高之
馮淮字會東性瀟灑好吟詩以朱橘詩見知於上海陸深
又好遊山水而力不能有士人游者願挾淮以爲重嘗
遊吳越諸山及匡廬武夷所至輒有詩時同邑張寰及
吳琬陸崑輩與吳興劉麟結爲詩社邀淮入社推爲篤
實君子久之病目率二子遷遂力耕自給卒年七十九
歸有光志其墓

陳嘉猷字盟之父儒字子醅嘉靖己丑進士授興化推官

歷順德通判南刑部主事勁挺有直聲嘉猷五歲喪父從母周居郡城族人齟之詣府候訊詰之不答至再乃泣曰覆巢之下不言且壓守憐而白之嘉猷歸發父書晝夜讀膝抵櫃至穿十八補諸生受知於巡撫陳道基司理龍宗武萬歷丙午魁順天薦授桐城教諭葺學宮勤教育甫三載告歸卒吳江道中初嘉猷與同里張文柱徐應聘陸夢履友善爲四子金蘭社歿後數年子世學請於當事建四先生祠於東山之巔世學字甯之弟世竣字尙之萬歷庚戌進士授建甯推官改大名擢御史楊漣下獄曾借科道論救內艱歸崇禎初起用病卒薛學閔字君叔工詩文與俞允文梁辰魚輩相切劘教授

生徒不計脩脯惟以造就後學爲事萬歷壬子已首薦僅得副貢晚益工詩嘗與友人夏暉倡和一韻往復各得數十首人爭傳寫名城南倡和集同時朱煥字武夷亦工詩得青蓮之一體以耆德舉鄉飲

孫紹周字從甫居邑之黃瀆世業耕父月川多隱德紹周敦品力學爲諸生時值御史行縣以驚擊自喜紹周於視學時岸立大聲講誦陽膚章指切時政御史爲歛容聽之曰子真理學之儒也萬歷壬午領順天鄉薦屢困公車教授里中後進多成材者

夏暉字士炎臨海丞佑五世孫喜讀先秦兩漢諸書以教授自給不屑世務詩文磊落自異工書善奕風致翛然

天性孝友與弟珣同居狀元涇奉母浦至九十餘猶依
依如嬰兒提學御史慎選優行之士惟暉兩膺是舉人
咸以爲無愧云

張大復字元長萬厯初歲貢維翰子少負雋才工制舉業
原本經史泛濫於漢魏唐宋諸家通曉大義尤得力於
司馬子長紆徐曲折極其意之所之要歸法度再游京
師名籍籍公卿間性故骯髒不屑曳裾侯門遂引去中
歲哭父兩目失明乃謝諸生業垂簾暝日呼嗣子桐籬
誦古今詩文於側口占筆授酬應雜沓日不暇給間入
詩壇酒社徵僻事商謎語拂塵而談聲朗朗徹戶外所
居梅花草堂在片玉坊席門蓬戶軒車恒填咽其間撰

崑山人物傳焚香隱几如見其人衣冠笑語期於畢肖
而後止記容城屠者董家溝老人及東征獻俘諸篇尤
爲時所稱以病廢自號病居士名其菴曰息崇禎三年
卒年七十七門人私謚孝敏先生桐字子琴先大復卒
桐子安涇字廷詒諸生桐旣病大復述作卽安涇執筆
性孝謹善事祖父疊遭喪亂毀瘁韜匿以終

徐應時字叔行少警敏補諸生與張大復友善工詞翰兼
精蘭竹又善琴以病早卒孫開禧字錫餘崇禎元年進
士授湖廣臨武知縣減徭役飭保甲立嘉木堡於要塞
處粵寇破鄰邑而封內屹然兩舉卓異擢編修十四年
江南大旱疏請停折抵兌皆報可陞右中允侍經筵主

福建壬午試國變後杜門著書卒年七十六

顧紹芾字德甫紹芳弟以諸生入太學天才俊逸工詩古
奇奧秀拔在太白長吉間尤善書法道勁入褚虞室華
亭董其昌嘗語人曰見德甫筆墨令人懷退舍之想少
壯時父兄方貴顯紹芾約身苦志力學不怠中年後益
務講求經世之學取全史所紀朝章典故地刑兵法鹽
鐵戶口悉標識之以備當事採擇尤注心節義之行輒
詳舉之以勵末俗卒年七十九子同吉早卒以從子同
應子絳爲之後

葉國華字德榮盛六世孫重華兄萬厯乙卯舉於鄉授定
海教諭入爲國子監學錄轉刑部司務陞主事以提牢
事坐累免官尋白改工部出權杭州南關國變歸里國
華質直好義在定海鎮守官縱兵牧馬鬻舍言之所司
懲以法在刑部黃道周以劾楊嗣昌奪情下獄禍叵測
國華獨左右之在工部請濬吳淞治蠹吏有興利除弊
二疏所爲詩力掃鍾譚亦不染王李習善草隸乞者無
虛日卒年八十六子三奕荃奕苞自有傳豹文字道子
國朝康熙甲辰武科進士先任臨清守備遷江西甯州銅
鼓石都司僉書在甯州肅部伍嚴保甲招流亡捐俸修
治城隍兵民賴之移疾歸

王志慶字與游臨亨少子臨亨家教凡五經三傳未徧毋
得及他書故志慶與兄志堅志長皆學有根柢志慶數

歲從兄志堅授經傳卽知大義應童子試不利以例入
太學爲祭酒顧起元禮部黃汝亨所賞識天啟丁卯舉
於鄉會試不第歸發故麓如志堅讀書法日有常課不
則篝燈畢之尤加意司馬通鑑考鏡抉摘孜孜不懈庚
辰詔舉賢良當事以名聞辭不赴葺東郊墓旁丙舍爲
園爲終老計作感事詩百首曰吾以告哀後其言皆驗
少與太詹張采長洲徐汧最厚善凡邑中利病輒引繩
批根白諸兩臺董刈調劑之崇禎未有良民三十餘人
被仇誣告密御史治之志慶悉其冤痛切陳訴於司李
倪長珩得盡釋久之長珩以語人三十餘人始知爲所
活踵門泣拜志慶遜謝而已辛巳大旱志慶益憂憤壬

午七月疽發背卒子四洵洄澗洄洄自有傳

歸昌世字文休有光孫十歲能詩歌爲諸生與嘉定李流
芳同里王志堅稱三才子李王相繼取科第獨昌世艱
於遇合乃發憤爲古文詞中年益放意爲詩以寓其偃
蹇不平之概晚歲詩律更細工書法小楷行草直逼晉
唐尤善畫竹酒酣後奮筆爲風枝雪幹人多攫奪藏弄
時游酒人間倚絃度曲韻味翛然而持身律已不受淄
涅邑相顧秉謙嘗請綽楔署書鄭重誣諉終弗許也晚
遭國變以感憤發疾卒年七十二子昭繼登莊自有傳
葉奕荃字元暉一字水修國華長子事繼母陳以孝稱以
諸生入太學工詩古文詞師事劉宗周徐石麟陳龍正

講求性命之學尤究心邑政利弊性剛直好義不能容人過乙酉夏以父權杭州關遇國變奕釜戴星往省時揭竿四起還至嘉善爲亂民所戕後覓其屍不得以衣冠葬之孫李暉字篆鴻工詩入嘉定庠 國朝康熙間以例貢授涇縣訓導課士最勤涇俗爲之一變宏毅字韋叔康熙辛未進士官終敘州知府

朱漢徵字方黠從張大復遊博學嗜古補諸生後客京邸以詩文名輦下家貧資修脯養母弟侃有文名早卒撫其子女終身晚益討求典故鹽屯律厯悉能詳其原委巡按御史周一經按部至崑欲往見吏白漢徵諸生可宣之入曰吾欽其文章品詣敢不造門耶時值歲饑就

見時抗論賑濟事宜絕不干以私旋保舉賢良方正入成均當得縣令未仕告歸死乙酉之難幼弟瀛徵性孝友撫孤姪如子晚舉鄉飲年八十餘卒漢徵孫之瓚字柅一好學有文畫竹得馬良指授兼工詩受籛未及貢而卒

按忠烈紀實稱上林苑簿朱漢徵與其孫之瓚所記未合或係福王時薦授是職而不及赴者

龔挺字季宏理五世孫好讀書工行草每貸書於人作行草償之亦時賃寫不受值以古書相抵至堆積盈架一挾輿摘微居傍城西僅蔽風雨編緝古今遺文多至千餘卷性挺遂急人之難膽力過人嘗隨其叔恩之定番州叔死於官道路險遠衆皆難之挺卒奉其喪歸張振德殉難與文挺偕其子紀赴都詣部白狀得邀卹典

歸葬如制人尤重其高義云

按選舉志無龔恩名其官定番州無攷

王煥如字仲至執禮孫父協嘉早卒事母魏至孝與兄景陽友愛甚篤補邑諸生改入吳縣學徙居郡城讀書嗜古以經濟自負凡先代典故無不搜討熟練崇禎中巡撫張國維彙訂吳中水利全書多出煥如手

崑新兩縣續修合志卷三十終

